

四庫全書

史部

欽定四庫全書

史部
硃批諭旨卷七之二

臣
永瑢恭校

編修
臣
裴謙覆勘

總校官中書
臣
朱鈐

校對官庶吉士
臣
張九鐔

謄錄監生
臣
胡念祖

欽定四庫全書

硃批諭旨卷七之二

硃批孔毓珣奏摺

雍正三年七月二十六日兩廣總督

臣

孔毓珣謹

奏為奏

聞事竊照廣東按察使宋瑋才守兼優勤慎明白於上年十一月間身患虛弱之症而刑名事務勉力辦理案件無悞奈精神氣力尚未平復行走未能便

捷又廣東布政使朱絳歷練勤敏才具優長於本年五月間忽染風痰之症調治半月已能坐立力疾辦事並無遲悞庫項清楚今尚力弱腿軟難於步履臣念二員俱屬有用之才方在壯年不忍遽行題請解任但藩臬管理通省責任匪輕二臣抱恙未愈恐有貽悞之處臣擬再令調治一月如仍不能痊可即

題請解任調治合先奏

聞臣謹

奏

朕有旨調宋瑋來一見今既身染疾病且不必令其赴京調治平復然後令其前來可也必俟大愈途中可以步履方令起程北上切勿任伊勉強扶病而行甚屬可惜之人也

同日又

奏為奏明交代撫篆事竊廣東撫_臣年希堯陞任_臣

於五月二十二日循例署篆赴省駐劄嗣聞新任撫臣楊文乾將次入境臣於七月初一日齎送印信俱經

題報在案俟新撫臣到省臣恭請

聖安再面行交代即具疏奏請

陛見然後回肇慶府臣駐劄衙門料理案件候

旨起程以遂瞻

天仰

聖之願其

臣

署篆經營太平粵海兩關稅務俟遠近報

齊之日將經收正稅羨餘數目具摺逐一奏

聞臣謹

奏

陛見之行且可不必俟楊文乾熟練地方情形之後朕
另有諭旨

雍正三年九月初九日兩廣總督臣孔毓珣謹

奏為恭聆

天語叩謝

聖恩事本年八月十二日瓊州總兵臣萬際瑞

陞見回粵面傳

上諭朕未見孔毓珣之面亦並無人在朕前保舉因聞其居官聲名好所以將伊重用可傳諭伊知悉當益加勉勵欽此臣跪聽之下不禁感激涕零臣已疏請陞見俟奉

旨到日趨赴

闕廷叩謝

天恩合先具摺奏

謝至奉

上諭營伍事宜萬際瑞已陞廣東提督俟其到任會商

舉行合併

奏明

臣謹

奏

朕實於章奏之間得知爾之居心行事又兼採聽輿論

言是者多所以如此信任從未有人著意於朕前稱譽者因此更見卿之孤介不事夤緣宜乎邀朕之見重也勉之

同日又

奏為奏明料理被水地方事宜事竊照廣東之廣州肇慶二府沿河低窪田地兩岸築有圍基以禦水患七月初旬大雨連綿至七月二十一二三等日廣西諸水及廣東南韶等府山水湧至歸海不及

以致高要高明四會三水南海五縣低處圍基水漫基面基隨水卸田禾淹浸房屋亦間有倒塌並未損傷人口幸離海不遠數日即漸消退臣於八月初三日自省旋肇沿途親驗漫溢處所田已漸次涸出勸民補種晚禾如晚禾補種不及則多栽豆麥雜糧臣身不能親到者委員分路查勘撫卹一面將被水情形

題報在案

臣

查圍基所以保護民田向係圍內有田

之家按田出夫修築但被水之後恐民力不繼臣

委員往廣西採買米石并省驗園基根脚有水急
衝深之處應用椿木者亦差員採買俟逐一備齊
分貯工所十月間農隙之時分段委員按照應築
土方傳集園內有田之家合力工作仍按人按日
給以飯米不必百姓費錢止須出力自樂趨事不
過兩月之內可以竣工至早禾收穫未久八九月
間尚不缺食冬底明春不能無缺臣擬臨時酌動

各縣新行社倉穀石賑濟倘社穀不敷再借支常
平倉穀令於來年秋收還倉臣惟有隨時布置以
仰副

皇上子惠元元務使窮民得所至意所有臣料理被水
地方事宜理合具摺奏

聞臣謹

奏

圍基被水情節知道了力所能者權宜辦理如力有未

逮不必拮据從事酌量應題請者具疏應摺奏者摺奏以聞朕不恡恩施卿之實心任事辦理有方朕實嘉之勉為之

同日又

奏為奏明復署撫篆事竊七月二十九日撫

臣楊文

乾到任

臣恭請

聖安一應署篆事務面行交代八月初三日疏請

陞見回肇候

旨初七日忽聞撫臣楊文乾丁憂復將印務交到臣

臣因一身管理督撫鹽政兩關五篆惟恐心力不

周當即

題明將巡撫印務交送將軍臣李杕署理乃將軍臣

此乃李杕不是所見左矣
李杕以有礙定例復行

題明將撫篆送回臣又恐遲一日則曠一日之事於

八月十二日仍行接理盡臣心力加緊兼辦以候

新撫臣到日交代也再巡撫衙門兼管粵海太平

兩關徵收關稅原有火耗除分給各關口巡攔橋
兵書役人等工食外太平關計有加一火耗粵海
關計有加二火耗從前不入贏餘之內臣查雷州
府屬東洋堤閘於雍正元年八月間被颶風海潮
衝倒

題報在案因堤長三千丈閘大小二十餘座工力浩
繁未得修築臣先署撫篆查撫臣年希堯任內尚
有存貯罰贖銀兩湊入臣兩關所得火耗即於七

月十五日委雷瓊道王璠廉州同知施上治齋往
工所募夫興修約十二月內可以完工又因七月
內南海三水高要高明四會等五縣地方圍基衝
漫即以火耗湊買飯米椿木率民興工以上二起
工程不敢絲毫累民亦不令屬官幫出分文即以
皇上賞給臣下之火耗為

皇上辦理地方公事合併

奏明臣謹

奏

以公完公極好之事料理甚屬可嘉

同日又

奏為奏明到粵外國洋船事竊照本年六月初四初五十五等日到啖咕喇國洋船三隻所載俱係黑鉛番錢哆囉啤吱等貨七月初四日到法蘭西洋船一隻所載黑鉛番錢羽緞哆囉等貨七月十七日到啖咕喇國洋船一隻哥沙國洋船一隻咖喇

吧國洋船一隻所載胡椒蘇木檀香等貨七月十八日到嗎吧喇斯國洋船一隻二十八日到暎咭喇國洋船二隻所載係胡椒檀香黑鉛番錢等貨以上六七月共到外國洋船十隻俱灣泊黃埔地方委員彈壓稽查不許內地閒雜人等擅入夷船生事併嚴飭牙行通事人等貿易貨物公平交易務在年內乘風信盡令開發歸國所有到粵外國洋船數目理合

奏報臣謹

奏

知道了嚴加約束稽查不可仍令沿襲故套

雍正三年十一月初十日兩廣總督臣孔毓珣謹
奏為奏明事竊臣一介庸愚荷蒙

皇上知遇隆恩臣即捐糜頂踵難報萬一奈事出無心
實干重罪悔愧驚懼不知所措緣雍正二年九月
內年羹堯遣人至伊兄廣東巡撫年希堯處託年

希堯代買紫檀木二百擔并託臣代買紫檀木二百擔臣一時應允及後年希堯買木之時臣亦墊銀七百六十兩買紫檀木二百擔大小計四十一根差人運送訖臣不料年羹堯大負

聖恩罪惡滔天與之代買代運罪實難追臣愚昧無知不能預料於事先理合據實

奏明認罪臣謹

奏

此等過失朕豈有不諒之理並不嗔責爾也年羹堯負朕深恩乃敢如此不法不但爾未料及實出朕之意外爾非黨附下流輩之可比朕雖未睹爾面深悉爾之居心為人為伊買木一事毫不必繫懷朕無識人之明悞寵匪類正自引咎不暇何顏復株連無辜此奏知道了朕從無心口互異之言日久天下臣民自當了然洞悉也

雍正三年十一月十五日兩廣總督臣孔毓珣謹

奏為奏報晚禾收成米糧價值事竊照廣東今歲晚禾除廣肇二府屬之南海高要等五縣因七月間山水陡發圍基漫溢田禾淹沒經臣勘明具

題在案此五縣內圍基未溢處所仍係豐收高雷廉三府屬因雍正元年塘倒鹹潮淹浸之處尚不能種植餘則大熟惠州府屬之海豐縣潮州府屬之普寧饒平二縣今年雨水稍多收成畧薄亦不成災其餘各府州縣俱係豐熟合計通省收成約有

七分米價細米每石九錢粗米每石八錢廣西收
成據報九分八分不等米價每石七錢六錢不等
再南海等五縣衝決圍基有將次築完者有築至
五六分者雷州府海塘堤閘亦有一半工程歲內
俱可完工合併奏

聞臣謹

奏

收成米價情形知道了其圍基海塘等處工程不可有

名無實當務一勞永逸為之方好不然築猶未築於民
仍屬無益也

同日又

奏為轉奏事案照文武官員凡有面奉

諭旨令該員繕寫具摺進

呈如不應具摺之官封固交該上司轉奏等因欽遵

在案今據廣東瓊州府知府岳綸呈稱將面奉

諭旨繕摺封固交臣代為恭

進前來理合遵

旨進

呈謹

奏

將岳綸原摺發回爾看內折角處字句差謬乃至如此不通且所記之語與朕諭大相懸殊此人甚屬粗率愚拙伊本部堂官及王大臣等並無奏伊好者因差往天津山東等處截漕回京復命猶似老成無欺朕棄短取

長補授外郡雖經補用恐其不克勝任今覽此奏摺洵
非通達事體之人爾察其在任如不能供職有貽悞處
即行叅奏疏內不必援引此旨若尚可姑留其嚴加飭
諭令伊重寫另摺奏來

同日又

奏為恭繳

硃批奏摺事竊

臣

兩次奉到

硃批奏摺八扣理合恭繳再

臣

前奏廣東按察使宋瑋

現患弱病奉

旨着宋瑋調理好日再令起程來京因宋瑋已於九月

初九日起程臣接內閣行文遣員趕往前途臣齎

摺差員先於江西萬安縣地方遇見宋瑋將原奉

上諭交給宋瑋欽遵緩緩而行隨據宋瑋呈稱病已漸

愈并請代為謝

恩前來臣即具

題代

謝在案合併聲明

臣謹

奏

覽奏知宋瑋病已漸愈朕甚愉悅萬際璋朱絳二員好官殊為可惜

雍正四年二月十二日兩廣總督臣孔毓珣謹

奏為

聖遇獨隆感激難名事本年十一月十四日

臣齎摺入

回粵奉到

硃批蒙

皇上以孤介二字許臣又蒙

頒賜哈密爪二個臣望

闕叩頭謝

恩跪讀領受訖欽惟

皇上聰明睿智超越千古凡大小臣工賢否誠偽無一

不入

聖明照鑒之中而臣區區愚悃更邀

聖上鑒察聆

天語之褒嘉嘗

上方之珍味感激涕零臣益懼有忝職守上負

聖明特達之知則臣罪滋大惟朝夕儆惕益加勉勵以
圖報効耳為此具摺叩

謝臣謹

奏

朕向在藩邸時自信然諾不苟每以心口互異匿怨交

人為恥今君臨萬邦而反以權術御下必無是理日久天下臣工自然洞悉朕之居心也君臣之間惟以推誠為貴朕與卿等期共勉之

同日又

奏為奏報鹽課事竊兩廣鹽課東餉西稅每年額徵銀五十萬三千四百餘兩今據兩省鹽道造報雍正二年課銀已徵完四十六萬四千四十兩零未完銀三萬九千四百兩現在催徵計已完九分以

上又雍正二年分廣東收鹽羨餘銀七萬七百一十九兩零廣西官銷羨餘銀五萬四千六十兩零二共羨餘銀一十二萬四千七百七十九兩零俱經臣具

題在案合併

奏明臣謹

奏

覽奏鹽課已悉國計民生輕重均屬相等若過偏則為

弊政萬萬不可其秉公勉為之

同日又

奏為奏

聞事廣東布政使常賚於雍正四年正月十九日到任

二月初八日到肇慶見

臣臣

見其舉動謙和見事

明白將來歷練熟習自能料理政務有益地方仰

見

皇上用人之當理合具摺奏

聞臣謹

奏

常賚資質頗好可以造就之人但要伊自能加勉始終無間則其增長何可限量耶

同日又

奏為敬聆

上諭感激陳情事竊新任廣東布政使臣常賚到肇口

傳面奉

上諭臣跪聽之下一一欽遵外伏念臣一介庸材愆尤

日積蒙

皇上曲宥矜全屢荷

溫旨慰諭臣銘勒五中感激無地惟有盡心竭力料理

地方生生世世永圖報効而已臣之屢請

陛見者緣臣今年五十九歲非少壯可比受

皇上特達之知未獲面覲

天顏叩謝

洪恩實寢食夢寐為之不寧今傳奉

上諭臣不敢即具疏復請但臣總督衙門每年冬春二季最為緊要而夏秋次之仰懇

聖恩憐臣誠惓於夏秋之間調臣

陞見倘蒙

俞允并懇

欽定可以署理之員俾得遵

旨交送印務合併奏

聞臣謹

奏

陛見之行且緩楊文乾到任伊始其報効之志辦理之才固不必言或恐其過於勇往直前急求奏效反致有不安帖處須稍遲時日歷練諸務候有旨召卿來時總督印務即命楊文乾暫行署理也

同日又

奏為奏明西洋使臣回國日期事竊西洋教化王臣

伯納地哆於上年六月間遣使臣噶達都易德豐進

貢臣委標下千總李成明護送赴京蒙

皇上優加賞賜遣員送回於雍正三年十二月二十五日回到廣東省城值法蘭西夷船到粵貿易回帆使臣等即齎捧

賜物搭法蘭西夷船開行回國訖住省西洋人仰沐隆恩無不感激愛戴所有搭船回國日期理合

奏明臣謹

奏

知道了遠夷慕化而來惟宜示以恩德萬不可與之爭
利切記

同日又

奏為奏明事竊照廣東之南海三水高要高明四會
五縣上年七月內被水秋冬之間米價頗平至冬
底春初日漸增長每石價至一兩以外臣即斟酌

將被水村莊社倉所儲穀石本村之民支用外但積穀無幾難以徧及窮民查存倉穀石例應存七糶三臣到任時見地氣潮濕倉穀久貯必致浥爛經具疏

題請每年春夏兩季兵米即於應糶三穀內碾米支給秋收徵穀還倉支給餘剩穀石照例平糶奉

旨俞允因上年初行衛所奉裁多有先徵米石給兵者未及赴倉碾穀又值米價平賤亦無人願買倉穀

所以應碾者未碾而應糶者未糶臣見此時米貴
將本年應碾給兵之外應糶者及時減價平糶并
將上年未碾未糶之穀一并陸續平糶以惠窮民
至五六月間即接早稻收成或早稻未收之先米
價已平即可停止庶窮民免食貴米而倉穀亦得
出陳易新

國計民生均有裨益緣遵糶三之例不另具
因時制宜以濟民艱正爾職分中事此舉甚好
題理合

奏明再雷州海塘雍正元年被颶風潮漲衝壞三千餘丈石閘一十五座臣已委雷瓊道王璠等帶員分界督修其南海高要等五縣圍基臣委各地方正雜官并發粵試用知縣等分圍督修照河工之式製備木夯石礮分發各工教以使用之法每挑土一層必用水濕透以夯礮築實使新土舊土粘此係爾熟諳之事可為圍工創始之師合一處層層如是但雷州海邊土性帶沙遇大雨亦可傷損臣令堤上及兩傍掘取帶有草根之土此亦固堤之一法

加上春雨降時草根生發草長根結則堤土可固
又廣東有一種榕樹其根最多傍水可生臣於三

栽樹

水縣圍基險要頂衝地方委署印知縣喬振先栽
植榕樹三處試驗抵禦水浪俟有效驗即陸續栽

植各工於十一十二兩月內節次俱報竣工尚有
原未衝決而低薄者臣亦酌發錢米幫築高厚仰
賴

皇上聖德格天川瀆安瀾海潮不至漲溢自可永保堅

固矣臣謹

奏

覽

雍正四年四月二十二日兩廣總督臣孔毓珣謹

奏為奏報雨水米價事竊照廣東廣肇二府屬之南海高要等縣上年被水業經

題奏奉

旨蠲免錢糧發倉賑濟其惠州府屬之海豐縣碣石衛

潮州府屬之海揭等縣因去年秋雨稍多雖未成災收成減薄又因今春陰雨連綿天氣寒冷民間所播穀種不得發芽有穀之家藏匿不賣米價陡長廣州府屬每石一兩三四錢至六七錢不等惠州府海豐縣碣石衛每石二兩五六錢潮州府屬及南澳地方每石二兩八九錢及三兩不等臣等即將糶三倉穀及上年未糶之穀通行發糶又撥惠州府倉應碾三穀石催備海船運赴碣石海豐

減價平糶再撥惠州府屬之長樂興寧二縣倉穀
由內河運至潮州府城及南澳平糶幸三月二十
二日起天氣晴霽和暖禾苗已俱栽插看來頗覺
茂盛將來早稻豐收則百姓安享樂利矣至於南
韶高廉等府上年原未被水米價俱平再廣東場
鹽全賴日色曬成自去秋至今春陰雨日多場鹽
亦少合併

奏明

臣謹

奏

所奏知道了秋成難以預期諸凡當早為料理寧可備而不用毋至用而不備也

同日又

奏為奏報廣西米價事竊廣西舊歲原屬豐收惟臨江州縣間有被水之處亦不為害因今歲春季陰雨寒冷兼以商販搬運米價較前稍貴合算倉石桂林府每石一兩柳州南寧太平等府每石八錢

九錢不等梧州府每石一兩三四錢不等撫臣汪
澂照存七糶三之例現將倉穀通行平糶目下天
氣晴暖稻苗茂盛栽插將遍理合

奏明臣謹

奏

知道了廣西積貯尚屬有餘似可以無慮

同日又

奏為奏

聞事竊廣東去歲秋收歉薄今春米糧漸貴經臣一面奏明將應糶三之穀發出平糶一面通飭遵行臣駐劄肇慶自二月初一日起每逢三六九等日每穀一石定價四錢二分零星平糶廣州南海三水二縣四鄉亦發倉穀平糶省城內係撫臣楊文乾自赴廣西採買米穀并廣東連州清遠等處買穀平糶至三月二十八九等日商船到省甚少米價陡長自一兩八九錢以至二兩省城閑傳云巡撫攔

截穀船用官價強買平糶以致米穀不敢來省於
三十日男婦老幼齊集多人在巡撫轅門求免官
糶俾四路米穀放心前來米價可平始而擁集轅
門懇求經管門人役趕逐繼則人多勢衆擁集大
堂將公案執事打壞撫標兵丁進往擒拏現獲數
十人衆人至晚方散當日責釋二十餘人尚留十
一人官糶停止米價亦漸平減適臣於四月初四
日到省會盤藩庫據巡撫楊文乾面說拏獲人內

有將軍綠旗兵丁一名旗下人數名據將軍李林
說壯丁冊內並無各人名姓巡撫現在發審理合

奏

聞臣謹

奏

此奏未得事之真情業已遣部院堂官前往查審矣

雍正四年五月二十八日兩廣總督臣孔毓珣謹

奏為微臣幸遂瞻

天之願踴躍難名事雍正四年五月二十六日接吏部

文開奉

上諭兩廣總督孔毓珣素諳河工事務伊從前屢請陞
見今准其來京著先至河上詳勘水勢協同齊蘇勒
將河工通盤修理事宜細加商酌妥議後請旨來京
兩廣總督印務著兵部侍郎阿克敦前往署理孔毓
珣俟阿克敦到廣後方行起身欽此

臣聞

命之下喜不自勝遵俟阿克敦到日臣將地方情形經

手事務面交代趨赴河工協同齊蘇勒將朱家
口漫溢處所及通盤修理事宜商酌妥議敬請

皇上訓旨面叩

天顏恭聆

聖訓合先具

奏臣謹

奏

如近日河工情景原可以不必令爾前往看視但總係

北來便道至彼與齊蘇勒商酌一番亦未必無益

同日又

奏為奏報早禾豐盛事竊照廣東去秋薄收今春陰
雨連綿米價漸貴幸三月二十二日晴霽自後五
風十雨田禾勃發秀茂結實勝於往年早者現在
收割遲者不過二十日內可以收齊恐厯

聖懷理合奏

間再春初米價漸貴經臣

奏明將應糶三倉穀并舊應糶未糶之穀開倉平糶
臣駐劄之肇慶每倉穀一石定價四錢二分近城
者分廠糶賣鄉間及被水地方撥載穀石就地平
糶自二月初一日起至四月二十五日止共糶過
貯府倉穀四萬六千三百石零飭將穀價貯庫俟
秋收買穀還倉再高要南海等五縣被水處所蒙
聖恩豁免錢糧又蒙賑濟得慶更生歡呼載道其未成
災地方有實係乏食窮民臣於肇慶東西北三門

各設粥廠買米煮粥自四月二十六日起給粥一個月
初時每日止二萬餘人日漸增多竟至五六萬人
今早稻陸續收成令其各散回收獲合併奏

聞臣謹

奏

朕在此正為粵東米貴憂慮覽奏朕懷甚慰

同日又

奏為彙報擒獲洋盜事竊臣因今春米貴窮民多有

乘間偷越出海為盜者隨嚴督巡海官兵竭力查
拏去後節據陽江縣報稱二月二十七日在太平
驛地方營縣盤獲陳亞璉等二十二名詢係登岸
洋盜又據香山協報稱拏獲行劫潮陽縣商船戶
洋盜譚建平等二名押解前來供出同夥二十八
人現將供出各盜分行提拏又據廉州府同知遊
擊等拏獲一起曾玉等供出在海行劫載穀船一
隻同夥十七人已經全獲等情除發按察司逐案

審解撫臣審

題外自拏獲數起之後海上已覺平靜且早稻登場
米糧日賤出海為盜之人自少再查盜犯等行劫
多在中路海面臣已將偷安不職統巡中路之護
理虎門協副將事都司黃洪圖分巡虎門守備林
石香山都司余元隆及千把總等俱

題叅革職以為怠玩之戒合併

奏明臣謹

奏

能如此嚴緝盜匪以靖地方庶無忝封疆重寄甚屬可
嘉

同日又

奏為酌議沿海緊要鎮營貯積穀石以備兵食事竊
照廣東素稱魚米之鄉然生齒繁庶家鮮積蓄一
歲兩次收成僅足餬口而潮州一府界連福建田
少人多即遇豐歲米價猶貴於他郡民間賴有常

平捐積等穀每年平糶接濟惟營內兵丁家口日繁一遇米貴即食用難支臣細籌通省形勢擇其緊要者先為預備議於南澳鎮城貯穀二十石鎮屬之澄海協貯穀一千五百石海門營貯穀一千二百石連濠營貯穀五百石潮州總兵駐劄潮州府城貯穀三千石鎮屬之黃岡協貯穀一千五百石潮陽營貯穀八百石碣石鎮貯穀三千石鎮屬之惠來營貯穀八百石平海大鵬二營各貯穀一

千二百石又提標五營駐劄惠州府城貯穀五千石督標連水師六營及肇慶城守營貯穀七千石以上共貯穀二萬八千七百石連造倉運腳並穀價共該銀一萬六千零二十兩

臣蒙

聖恩補授兩廣總督收稅各府向有茶果銀兩

臣經

奏明除每年食用及一應公事之外尚有餘剩是皆

皇上之所賞賜即為

皇上兵丁貯穀備荒每年遇青黃不接時借給各兵於

秋收散餉時令其照數買還槩免加息年年如是其穀責成各營將備經管提鎮盤查倘有侵蝕缺少

題叅追賠本應俟穀石買足之後

題報今臣接到部文奉

旨陞見除咨明署督臣阿克敦行催各鎮營務在實買貯倉并

題請定例永久遵行外理合

奏明臣謹

奏

積貯穀石以濟兵食實為美舉且籌計亦屬恰當知道了

同日又

奏為恭繳

硃批奏摺事竊臣陸續奉到

硃批臣奏摺共一十六件臣俱跪接一一凜遵訖所有

原奉

硃批奏摺理合恭綴再臣於上年十一月內據瓊州府

知府岳綸將奉過

訓旨具摺回奏請臣代為恭

進等情臣隨遣人齎摺進

呈及奉到

硃批知所奏與

聖訓大相懸殊可見該員粗率鄙俚

訓旨下頒全無領會正在發回飭諭間而岳綸已經撫

臣楊文乾

題叅離任似無庸令其重寫進

呈理合回

奏臣謹

奏

知道了岳綸真可謂庸材實係不應姑留之人

雍正四年六月十五日兩廣總督臣孔毓珣謹

奏為欽奉

上諭事雍正四年六月初八日臣齎摺人回粵奉到

硃批諭旨臣跪讀之下不勝歡忭踴躍念臣庸碌之人

仰荷

殊恩叨膺封疆重任未得一覲

天顏恭聆

聖訓犬馬依戀之私日夕難安是以不避瑣瀆屢次陳

請今蒙

恩准得遂微忱河工事宜臣前任邵睢同知時所管不
過偏隅識見有限總河臣齊蘇勒任事年久料理
自必合宜臣先到河工與之和衷商酌悉心籌畫
盡臣愚見請

旨遵行臣候阿克敦到來所有一切事件并地方情形
臣當逐一向其說知然後遵

旨起程所有欽遵緣由并奉到

硃批諭旨理合恭繳臣謹

奏

今春因朱家海決口合龍復潰朕心甚憂猶幸桃汛伏
汛水勢平靜諒無大患矣卿仍遵前旨過淮見河臣齊
蘇勒與之悉心商酌可也

議奏藍鳳條陳六事所議甚是摺留中待卿到京面諭
雍正四年七月二十二日兩廣總督臣孔毓珣謹

奏為奏明防禦神苗遁逸事案照雍正四年五月二
十四日准廣西提臣韓良輔咨准貴州提督馬會

伯咨開廣順府屬長寨羊城坳等處因擒拏狎賊
阿進等一案安汛設塘乃各寨狎苗恃險塞隘不
容修建營房已調官兵撫剿恐兇苗奔逸隣省請
檄交界營汛撥發官兵堵禦等因到提督轉咨到
臣除附近交界營汛經提臣飭撥官兵防禦外臣
即檄行廣西思恩府知府會同營弁嚴加堵禦去
後本年七月十五日據思恩府屬之西隆州稟稱
探得貴州提督調發官兵進剿狎苗五月初七日

分路前進已取得長寨并十三小寨今兗苗俱奔
至羊城屯上其地高險官兵現住長寨地方屯後
係大菁界近粵西徑通泗城等情稟報到臣臣即
分飭廣西按察司思恩府并思恩副將泗城副將
等多撥官兵在於交界要隘處所會同堵禦毋使
兗苗遁逸仍將情形不時探報等因并咨廣西貴
州撫提諸臣查照各在案事關防禦兗苗理合奏

聞臣謹

奏

此事朕曾再三籌度仲苗甚為跳梁非加一番懲創不可因命舉行今據該撫提諸臣奏報業經剿撫平定矣
同日又

奏為奏明事竊臣題覆原任撫臣年希堯疏叅鹽商

查良石即石興祚控告高州府知府郭志道套埠

吞本一案經部議駁查奉

此等事情即該部不行駁查朕亦必不容朦朧完結也
旨這事情著交巡撫楊文乾另行審明具奏欽此除郭

志道有套埠吞本聽撫臣另審外臣查此案緣湖
廣糧驛道許大定虧空銀米供出石興祚借欠伊
銀七千兩准湖廣巡撫咨追石興祚業因鹽餉未
完將商名查良石告退躲避獲後控官旋即病故
臣於伊子石之瑜名下追銀完項在案今准部駁
內開石興祚因不能完餉告退何病故後伊子即
能將七千兩之項照數完納等語指駁誠是但其
間實有隱情彼時石興祚見伊子被獲自知難免

遂具套埠吞本情詞將郭志道控告以圖推卸未經質審遽爾病故伊子石之瑜質對無辭竟自承認臣思石之瑜乃異鄉赤貧之人承認銀七千兩係抵補許大定虧空帑項難容懸待轉飭承審各官完銀定案郭志道係解任質審之員以為是非已得明白急圖結案暗中代為完項臣以帑項為重知此情由聽其代完是實但不早為奏出愚昧之罪無可置辯理合據實

奏明仰祈

聖恩矜宥臣不勝惶悚畏慄之至臣謹

奏

是非自有定論朕亦豈得偏私俟該撫審明結案後看
雍正四年十一月十五日兩廣總督臣孔毓珣謹
奏為奏

聞晚禾收成米糧價值事竊照廣東省廣惠潮三府屬
低田晚禾於七八月間兩次被水經撫臣楊文乾

會

題在案今據布政司詳委幹員查勘惟廣州府之東莞增城清遠花縣與惠州府之歸善博羅共六縣沿江低窪之處成災幸俱未多目下栽種雜糧亦甚茂盛其餘各府州收成自六七分以及八九分不等通省合計約有七分米價廣惠肇韶南五府屬每石自一兩至一兩二三錢不等潮州府屬每石一兩五六錢高雷廉三府屬每石自七錢至八

九錢不等至廣西省晚禾通省收成俱有八分各屬米價每石自六錢起至九錢一兩不等兩省地方寧謐合并奏

聞臣謹

奏

覽兩廣秋成深慰朕懷

同日又

奏為奏明微臣交印起程日期事竊臣於六月二十

日准兵部咨開奉

旨廣州將軍員缺著阿克敦署理俟石禮哈到廣州阿克敦將將軍印務交付石禮哈之後孔毓珣再起程來京孔毓珣起程之後阿克敦再署理兩廣總督印務欽此今廣州將軍臣石禮哈於十一月初九日抵廣州任臣欽遵

聖諭將一切事宜備悉與署督臣阿克敦說知於十一月十六日交印起程所有雍正三年九月初七日

奉到海洋事宜

硃批諭旨一道與

硃批

臣

議覆金鐸條奏摺一道因撫

臣

楊文乾提

臣

萬

際瑞尚未畫一議覆不能會奏今

臣

起程遵將

諭旨二道面交署督臣阿克敦俟撫提二臣覆到會

奏所有微臣起程遵

旨先往河工日期理合奏

聞臣謹

奏

母因急欲見朕將河工事宜不行詳悉商酌而草率塞責亦不可故意耽延稽遲日月

雍正四年十二月二十九日兩廣總督臣孔毓珣
謹

奏為奏明微臣已到河工日期請

旨恩准協理河務事竊臣遵

旨自廣東肇慶府起程先往河工日期業經

奏報在案今於雍正四年十二月二十九日至江南
徐州地方由邳宿桃源清江高堰中河一帶查勘
至於應行修理緊要之處臣必悉心相度再同總
河臣齊蘇勒通盤商酌另

奏外臣思河工關係重大兩廣地方雖屬緊要然內
外諸臣才堪辦理者多而曾任河官者少臣壯年
時曾為河員於河務畧有分曉現今蒙

皇上軫念民生不惜帑金修築一切緊要工程俾萬世

永賴伏懇我

皇上天恩賜臣以副總河職銜協同催督工程相地防
險奔走查勘以佐河臣齊蘇勒精力之不逮臣盡
心竭力務期和衷共濟以盡臣區區圖報之愚衷
仰懇

聖恩俯允再照前奉

聖諭將修理事宜妥議後請

旨來京但臣瞻

天念切懇

恩准臣同河臣會議具

題後廿四即起程赴京合先請

旨

命下欽遵臣謹

奏

仍遵前旨行毋違至於爾之宜廣宜淮朕自權輕重而

酌量任用

硃批諭旨卷七之二

欽定四庫全書

硃批諭旨卷七之三
史部

臣永瑢恭校

編修臣裴謙覆勘

總校官中書臣朱鈐

校對官庶吉士臣張九鐔

謄錄監生臣朱學漁

欽定四庫全書

硃批諭旨卷七之三

硃批孔毓珣奏摺

雍正五年二月十五日兩廣總督臣孔毓珣謹

奏為奏

聞事竊臣欽奉

諭旨先至河上詳勘將通盤修理事宜細加商酌臣遵
同總河臣齊蘇勒逐加會勘酌議業經河臣會疏

具

題外臣查黃河自徐州地方起至安東縣止一路詳
勘兩岸歲修各工俱屬平穩朱家口已經合龍又
築月堤一道工程不日可竣看來亦可穩固惟宿
遷縣治之西黃河與中河相近處建有草壩名曰
汰黃壩運河水大則清水分流由汰黃壩入黃河
以刷黃如黃河水大則黃水分流紆迴由汰黃壩
入中河以濟運實屬有益查從前入中河濟運者

黃水十分之一二近今黃河南岸長一沙嘴逼溜
北行其黃水歸入黃河者十分之六入中河濟運
者十分之四且水流亦急臣省此處頗有關係因
三次親歷其地詳細確勘併與河臣確商齊蘇勒
以為將汰黃壩兩壩向中俱進埽兩排壩口收小
以束水勢即可無虞現在下埽臣猶不敢放心又
加詳勘見南岸沙嘴之上黃水灣曲處可挑引河
以避此險如果汰黃壩收小之後水勢平緩則應

此見^是好
照舊倘水勢仍急則俟齊蘇勒相度定議另奏不

致有厯

聖懷也臣原擬將勘過情形面

奏今於宿遷縣地方接准部文奉

旨命臣會勘江南水利有稽時日合先據實

奏明臣遵於本月十五日即赴清江浦會同前往勘

議妥確會

題臣謹

奏

所奏知道了江南水利詳悉籌畫會奏以聞

雍正五年五月二十九日兩廣總督臣孔毓珣謹

奏為恭謝

天恩事竊臣於會勘黃河議興水利事畢即遵

旨赴京親承

聖訓諄諄悉屬典謨訓誥

言之匪難行之不易大都熟徑得力處難遷捨舊染重
教臣不逮勉臣將來使臣愚蒙頓開感激之下不覺涕

習者不易華果能不忘此時此奏此際此心朕與卿之
福兩廣兵民之福且臣自見以至福曷有涯耶勉之勉之

陞辭日荷

聖恩錫賚日飽

天厨異味錫以

宸翰賜以冠服種種

隆恩優渥難數我

皇上孝思純篤以臣為

聖祖仁皇帝舊臣

特賜臣

聖祖所遺寶玩俾臣長瞻

手澤廣錫類之弘仁極人臣之榮寵臣何人斯膺此

異數惟有恪遵

聖訓覽御奏謝知道了犬馬愚衷事

主以誠辦事允盡此四字諸務理矣以公整肅寮屬綏輯兵民以仰報我

皇上高厚之恩於萬一耳臣蒙

聖恩准假六日臣於五月二十三日抵汶上縣地方與
臣兄孔毓琮手足相聚闔家老幼叩謝

天恩於五月二十七日前赴闕里拜祭畢即於二十九
日起程赴廣俟回任後照例繕疏另行恭謝

天恩外合先具摺奏

謝臣謹

奏

覽

同日又

奏為欽遵

聖諭事竊臣受

皇上隆恩世世子孫圖報不盡臣第三子孔傳焯原捐
通判應陞臣受

恩深重臣子正當共効犬馬之報不揣冒昧奏懇

皇上請將臣三子孔傳焯以侍衛効力荷蒙

聖恩面諭臣欽遵

俞旨即令臣子孔傳焯齋摺叩見

皇上并代臣奏謝

弘恩臣謹

奏

已有旨矣爾子孔傳焯若用為武職殊覺可惜但觀其志趣似近於華而不實宜亟加教誨令伊務一實字

同日又

奏為奏明事竊臣於五月十三日

陞辭出京一路所過州縣地方留心訪問官俱循分供職民亦相安樂業惟至闕里廟工處所臣見有堆貯做就石料并燒成磚瓦而並無匠作興工臣細問情由據曲阜縣知縣孔毓琚口稱原任巡撫陳世倌差委都司鈕國璽領銀採買木料將買來木植沿途私賣現經巡撫發按察司審訊聞得鈕國璽已將私賣情由供認所有運到木植與原估之式不合所以未能興工等語臣思

皇上發帑興修實萬世之

曠典自應盡心辦理速行償工告竣以垂不朽都司鈕國璽何得採買木料多不合式且任意沿途私賣

玩誤

欽工殊屬不法撫臣陳世倌並不仰體

聖心慎重

欽工遴選賢員混行差委以致侵冒誤工更屬不合為

此據實

奏明臣謹

奏

此事經塞楞額據實奏聞朕已特降諭旨命其嚴查矣

雍正五年八月十九日兩廣總督臣孔毓珣謹

奏為奏明補栽晚稻情形事竊臣恭聆

聖訓回任路由廣州府所屬三水縣及肇慶府所屬高要縣地方見沿江圍基以內田畝積水未消晚稻未栽臣詢之農人僉云本年五六月間雨水過多

兼以江水漲發經久不消各竇不能洩水以致圍
內水深是以不能栽插將來水即消退亦無力買
秧補種等語臣思三水高要兩縣圍內之民較之
別縣為稍貧若聽其收成無望將來補救益難臣
於七月十九日回署即虔心默頌

皇上訓臣

旨意步禱至

天妃廟祈求水退一面發銀差員購買民間栽剩秧

苗竊喜仰賴

皇上至誠感格十九二十二三日之內江水陡退
各圍竇門俱開積水暢洩圍內田畝陸續悉行乾
出臣將差員所買秧苗俱散給兩縣各圍百姓十
日之內皆已補栽完畢現在禾苗青茂嗣後雨水
及時可得晚收是皆仰賴

皇上之福庇也臣謹

奏

人

神交感之理實如影響但以公誠祈禱未有不應者若瀆
諂營私則不能遂所願也

同日又

奏欽惟我

皇上垂念民瘼各省收成米價時厯

聖懷臣回任路經南韶以及廣肇屬縣見晚稻栽插俱
青茂可觀其餘各府亦栽插完畢近今米價肇慶

每石一兩四五錢廣州一兩五六錢南韶惠羅定
各府州縣或一兩二錢一兩三四錢不等高雷二
府亦一兩一二錢不等惟潮廉瓊三府因去歲歉
收較他處為貴屬縣內有賣一兩八九錢暨二兩
外者將來若得晚稻豐登米價自必漸減理合據
實先行奏

聞臣謹

奏

粵東米價原屬消長難憑目下一時稍昂似無足慮

同日又

奏臣於

陛見時蒙

皇上諭臣潮州分司俞文耀為人甚猾臣以文耀錢糧
清楚其為人猾處未能省出回奏既而出都途中
每自思忖我

皇上睿智天錫觀人一言一動即已洞徹隱微文耀為

人自難逃於

聖鑒臣一抵肇慶查其督收場鹽玩忽從事果不實心
辦理隨具疏糾叅但臣識見淺陋愧乏知人之
明惶悚無地嗣後惟有加意訪察不為屬員所蔽
以仰副我

皇上任使之至意臣謹

奏

觀人之難大抵皆同何敢保其必不悞也似此亦不過

偶然符合耳

同日又

奏為奏

聞事竊臣據肇高廉羅道王士俊詳報黃江廠典吏李長茂重役朋充高要縣知縣姜弘焯朦混出結並李長茂用銀一千二百五十兩賄鑽布政司陳庫官方肯詳院給劄等由到臣經臣批行按察司會同肇高廉羅道嚴審實情通詳核奪去後臣又面

訊高要縣知縣姜弘焯隨據稟稱黃江廠現在填單書吏鄧作斯原係肇慶府錢科典吏五年役滿因在廠中白役一年隨串同李弘材投認廠吏李弘材等許本道王士俊心紅銀四百兩本道即牌行卑縣督取印結卑職不肯出結遂挾嫌通詳等語臣又詢據按察使方願瑛口稱從前肇高道王士俊曾向署撫常賚要將李弘材投充典吏因常賚不允不能獨得心紅銀兩是以挾嫌通詳等語

其重役朋充一案尚未審詳於雍正五年八月十四日准署撫臣阿克敦移送疏稿以該道王士俊欺隱黃江廠稅羨銀一千二百餘兩

題叅摘印除俟按察司方願瑛分別審詳外理合將道詳縣稟各由據實奏

聞臣謹

奏

已有旨矣爾係知朕之人非他可比百凡惟以公當為

主萬不可絲毫涉於瞻徇官達方願瑛二人皆深負朕
恩於中若少有瑕釁切毋為之隱蔽秉公察審明白具
奏

陳祖訓原係朕記名好官近日始廉知伊任汀州鎮時
將陳有功在任年久廢弛營務之處並不奏聞亦不行
整理甚屬不及茲南澳一鎮更為緊要何可如此因伊
人材可取姑予寬恕俟其請安奏摺到來當切加訓諭
勗伊改過但恐下愚難移怙終不悛爾其時刻留心查

訪奏聞

雍正五年九月二十九日兩廣總督臣孔毓珣謹
奏為南丹礦徒遵法解散事竊臣欽奉

皇上面諭廣西南丹土州礦徒一事臣回任後即差標
員前往確查路由柳州府提臣田峻亦差守備會
同前去臣又行知河池州河池營協同差弁齊至
南丹地方帶領南丹土知州莫我謙確查前項礦
徒如有聚集即宣布

皇上德威曉諭礦徒總督仰體

皇上好生之仁不即發兵勦捕須速解散等語隨據河池州營稟稱查勘南丹錫廠共井礦四十餘處礦徒及住家開鋪人等約有萬餘人曉諭之後咸知遵法內中單身傭工者即時散去其帶有家室居住者亦俱催夫挑運行李陸續搬散淨盡等情續據臣差標員回肇稟同前由并取有土官印結等情臣查南丹錫礦界聯貴州之獨山州及豐寧上

下土司自宋至今黔楚之民時聚偷挖雖歷來從未生事亦不便任其聚集今仰賴

皇上德威遠播礦徒盡散地方自可永靖除臣一面知會黔省并飭行廣西文武仍不時查察外所有南丹礦徒遵法解散緣由理合

奏覆臣謹

奏

欣悅覽之南丹礦徒聚集已久今如此不動聲色一旦

散去朕實未料及即泗城土府之事亦出於意外凡此
皆仰賴

神明默助

聖祖在天之靈護佑之所致朕感幸之懷莫可言喻

同日又

奏為場鹽盛產事竊照廣東場鹽缺收臣回任後將
怠玩督收各官

題叅在案今臣又委官嚴飭各場耙曬八九兩月天

氣清明場鹽盛產現在源源配運我

皇上愛恤商民恐致上厯

聖懷合將鹽斤盛產情由奏

聞臣謹

奏

場鹽盛產民無食淡之虞朕懷深慰

同日又

奏為奏明催補倉穀事竊臣回任後查廣東省倉穀

自臣

題請每年存七糶三於糶三之內碾支兵米將民間
應納糧米秋成徵穀還倉兵民兩便雍正三四兩
年間廣惠潮等府偶因被水歉收賑濟之外其平
糶接濟貧民者甚多廣西省平糶穀石未曾買補
者亦不少查詢各屬均稱穀價尚未平減須得陸
續還倉臣隨嚴加檄飭務期買補足額現在兩省
各屬俱上緊採買雖現今民間收成不等穀價貴

賤不同其各屬平糶原價有敷亦有不敷臣念倉
儲關係重大必不肯令屬員藉此揆延惟是我

皇上愛惠元元倘因一時買穀數多將來或致米價昂
貴臣當查明所買倉穀果係缺額無多臨時會同
撫臣酌量據實

奏明另行請

旨遵行合先奏

聞臣謹

奏

所奏是隨時制宜酌量為之

同日又

奏為覆奏事竊臣欽奉

皇上面諭張象乾原因怡親王保舉所以用為知府朕
聞伊從前聲名不好朕在藩邸時如傅鼐博爾多俱
是自幼在門上行走之人因伊等後來做官不好朕
俱執法處分豈有怡親王保舉之人做官不好朕不

處分之理可傳旨與張象乾令伊改過勉力做好官
欽此今於雍正五年八月二十四日據惠州府知
府張象乾到肇謁見臣敬將面奉

聖旨密傳訖理合

奏覆臣謹

奏

再三教導留心察驗

雍正五年十一月十六日兩廣總督臣孔毓珣謹

奏為奏

聞晚禾收成米糧價值事竊照廣東今歲晚禾高雷廉
瓊四府收成俱有九分十分米價每石自五六錢
以至八九錢不等南韶二府收成約有八分米價
每石八九錢一兩不等惠潮二府收成約有六七
分米價每石一兩五六錢不等廣肇二府收成亦
有六七分米價每石一兩二三錢不等其廣西一
省通計合算收成約有八分理合奏

聞臣謹

奏

覽收成米價情形深慰朕懷

同日又

奏為奏

聞弁兵捕盜傷故事案據廣東肇慶協副將李斯援報
稱高要縣金利墟民黃德公等舖於本年八月二
十一日夜間被盜行劫鄉勇兵丁救敵當場殺死

賊犯一名鄉民被賊傷故二名有肇慶協左營把
總陳章帶兵接續追拏賊犯放鎗傷故把總陳章
并兵丁劉鳳陳武二名隨陸續獲賊黃亞三陳亞
六等移解高要縣收審等情據原署縣黃六吉及
現任高要縣知縣戴維賢先後報稱訊據賊犯供
稱同黨三十二人為首係黃翻眼下手傷故官兵
係大春四黃亞三等今現獲黃翻眼大春四黃亞
三等二十六名殺死關日上一名未獲亞澤十三

亞短長脚六闕亞六五名等情經臣檄飭嚴拏未
獲各盜并審招解去後查把總陳章捕賊身亡深
可憫惻臣親加致祭并將傷故兵丁二名家屬俱
重加賞恤以示鼓勵查開疎防職名另叅外所有
弁兵捕賊傷故並現經獲賊緣由合行奏

聞臣謹

奏

未獲盜犯飭令嚴緝毋致少有疎縱及隱飾情弊

同日又

奏為奏

聞事竊查廣西思明土府屬鄧橫安馬那練蕾蓬四寨
其地隣近交夷各寨土民周圍種竹挖濠往往恃
蠻不法盜剝牛隻搶奪客貨并彼此尋仇捉人勒
贖臣回任後委思明府同知帶同城守把總前往
該寨曉諭令其清查煙戶砍竹填濠勒拘有名罪
犯繳出軍器如果改惡自首准予從寬倘敢違抗

即撥兵擒捕去後今據思明同知等報稱於本年十月初二日前往各寨曉諭該地土民悔罪求寬砍去圍竹露出村莊土濠填塞繳上鳥鎗十五桿并將搶牛捉人各犯莫賓昌黃選高等解出各寨造具煙戶細冊出具改惡遷善甘結并據廣西陞任按察使徐湛恩轉詳前來臣仰體

聖慈念土民既經革心悔過准予自新從寬分別責結如有再犯倍加懲處批行發落在案所有清查過

鄧橫四寨緣由理合

奏明

臣謹

奏

既取有改過自新甘結存案自應姑免重懲再犯不可
絲毫寬宥

同日又

奏為奏

聞西洋官商在澳慶祝

萬壽事竊據惠潮道樓儼稟稱奉署巡撫阿克敦行委
陪御史常保住伴送西洋使臣麥德樂歸國於本年
十月二十六日前至香山縣澳門西洋使臣麥
德樂等請於十月三十日率領兵目理事夷商慶
賀

萬壽御史常保住再三宣諭我

皇上崇尚節儉不事繁文西洋使臣麥德樂等僉稱

皇上深仁厚澤加惠遠人實為異數謹擇於天主堂誦

經恭祝

聖壽並非別樣虛文等語常保住見其感激出於至誠
不能勸止至期夷官商民排班行禮虔誠慶賀於
十一月初一日常保住在澳起程回京等情到臣
理合據報繕摺奏

聞臣又聞御史常保住一路廉靜待夷人亦甚得體合
併奏

聞臣謹

奏

此奏與朕所聞不侔比聞常保住一路將麥德樂視為
奇貨到處多索人夫騷擾地方諸事過當殊傷國體在
麥德樂自應感激其如中國體統何果否如此據實奏
聞毋因此奏在前少存回護致涉容隱

雍正五年十一月二十六日兩廣總督臣孔毓珣

廣東提督臣王紹緒謹

奏為酌存營中公糧以辦公務事竊查廣東地方山

海交錯防範彈壓全重整飭營伍臣等荷蒙

皇上天恩職司全省兵馬敢不實心釐剔以期餉無虛

冒兵皆精銳仰答

弘仁而營中實有公用有不得不直陳於

聖主之前叩懇

聖恩者臣等查水陸各鎮協營每年辦公事俱有必

需公費臣孔毓珣在京

陛見時仰見我

皇上於一切營伍情形無不洞悉機宜周詳籌畫今營中公用臣等何敢隱瞞謹再四會商與其任各營虛扣掩飾不若酌留公糧定其數目核實支用議令各營按照額兵多寡在陸路營合馬步戰守每兵一千名內酌留守糧三十名水師營每兵一千名內酌留守糧四十名將銀米留貯在營以支公用倘於定數之外再有空糧并扣尅虛冒等弊查出嚴叅治罪如是則營中公事可辦混冒影射可

除似於營伍有益是否可行恭請

聖明指示臣等謹

奏

總在卿等揆情酌理料理合宜

雍正六年二月初六日兩廣總督臣孔毓珣謹

奏為添委土官協丈歸順公田事竊廣西歸順土知
州岑佐祚請將公田苗價銀六千五百兩歸公充
餉臣經

題報并請委思恩府知府陳堯賢勘丈在案但查此項公田原為土州世業向因岑佐祚年幼襲職其母許氏行止不端多有私用印照將田分給親狎頭目久已據為己有厥後許氏雖經物故而岑佐祚懦弱頭目强悍不能清回往往致訟是以詳報歸公臣思流官知府恐有未諳土俗事宜而土人蠻野性情難測臣查有田州土知州岑應祺頗能出力辦事且又熟諳土情隨委協同查丈倘有土

棍阻撓易於拘拏方為安妥再公田清丈之後如
土知州岑佐祚查無別項養廉臣當與撫臣酌撥
養贍數目一并具題請

旨以廣

聖恩合先

奏明臣謹

奏

所奏是其岑佐祚養贍當寬裕賜給勿令窘乏凡經理

新定改流州縣但以安輯地方為要至於財賦細事不宜與之錙銖較量致令無知土人不信國家救民水火之心反謂貪其地土戶口也此事關係甚重若稍辦理不妥將來追悔莫及當深體朕心籌畫盡善毋忽

同日又

奏為欽奉

上諭事雍正五年十二月二十五日署廣東布政使王

蒼署按察使尹繼善同到臣署密傳

聖諭

臣

謹祇領竊查肇高道王士俊具揭解任布政使

官達等一案

臣

准到部文經檄委署藩司王蒼署

臬司尹繼善會審詳解在案今撫

臣

楊文乾回任

路經肇慶至

臣

衙門面商又添委糧驛道何師儉

鹽運使史在甲會同布按兩司審理俟詳解到日

臣當遵

旨與撫

臣楊文乾將軍

臣石禮哈從公審出實情具

題請

題請

旨所有臣奉到

上諭緣由合先

奏覆臣謹

奏

東公審理務得實情具奏以聞

同日又

奏為奏

聞泗城戶口田土事宜事竊查泗城土知府岑映宸奉

旨草職地方改土歸流以紅江為界江北歸黔江南歸
粵一應戶口田土錢糧及所收土官自食官莊田
米據黔粵委員并泗城知府劉興第等冊報到臣
經臣批行布政司查議在案嗣准原任廣西撫臣
韓良輔疏稿據泗城協副將王大綬貴州貴陽府
同知黃世文雲南楚雄姚鎮標遊擊馮鸞等稟稱官
莊族役田可變價二萬餘兩題請變價并查現在
收米不止知府劉興第所報之數等因又據泗城

知府劉興第詳稱土知府自食官莊五百二十六
白之田除應給武舉岑映翰存祀并尚有老土知
府眷口亦得量給未可概賣其族日久工各役之
官田一千八百五十六白分食已久役既裁革若
賣其田即數百家失業且奉

旨族人願留者聽既留其人更不便盡賣其田至於清
此議合宜

韓良輔丈一事甫經改流止可先照土例論白徵銀俟民
輔於諸事原欠妥協所論何足為據
心既輯然後每亭抽丈巡撫韓良輔不將原詳妥

議惟加嚴檄切責總因卑府獲罪上司且泗城清

當原情定案

查同知需索不遂又副將王大綬前得土知府銀

六百兩守備龔進忠收土知府一妾營米派撥土

此舉大屬不合斷不可寬貸

民搬運卑府通詳又獲罪於武員故以難行之事

責令辦理若不瀝情具詳致生事端罪恐難測等

由各到臣除批廣西布按二司確議外臣查官莊

族役田二千三百八十二白除遵

旨酌給武舉岑映翰留祀等項外多者自應變賣歸公

而據該知府劉興第詳稱族目久工各役既有數
百家分食已久又當仰體

聖慈不可令其失業致生事端臣愚以為右江鎮臣段
宗岳到任之後兵力足資彈壓然後再委賢員將
是

官莊田地分別酌給餘者變價充公雖不能如韓
良輔所題二萬兩之數而內哨官田有九千九百
餘白即照知府劉興第所議每白上稅一兩約可
收銀一萬兩又每白徵銀四錢每年可額徵銀四

御須

出酌安協選委賢員辦理朕不同悉地方情形難千兩尚有江北江南外哨官田亦約有萬白稅徵

以懸

銀亦約可相等至於民間私田當與前項田畝一

官莊

民田二者均與鄂爾泰商酌可也并清理定立賦額以示章程是否有當相應請

旨臣然後咨會廣西撫臣雲貴督臣會商舉行再泗城

副將王大綬前因其漢仗弓馬頗優是以考列一

等咨部今有此貪賊與守備龔進忠容臣另疏

題叅合併

奏明臣謹

奏

王大綬朕亦甚為獎賞人明白才具可取前泗城總兵
缺幾欲將伊擢補因疑其心欠誠實所以未用今果若
此矣但其受賄情節當詳加推原必得實據方為不誣
不可因文武不和據一面之詞即行糾叅予受之際盖
必有由如或出於上官情願餽遺從前無強逼勒索之
狀受後無枉法廢公之舉不過托交接之誼染指些須
猶可念其向日効力處等其功罪而量加處分也

同日又

奏為奏明安插廣東自首賊犯事竊臣於上年十月間訪聞清遠四會等縣交界山場有賊徒潛聚隨密飭撥兵分佈擒捕賊徒知風於本年正月初四日為首馮友順帶同夥衆朱相泰等二十七名赴臣轅門投首又於二月初五日據清遠縣遊擊稟稱有馮友順同夥邱及蘭等一十七名赴清遠縣該將衙門投首今帶押前來驗訊一并安插等情

據此臣訊據各犯供係廣東潮州惠州韶州并福建人民平日種藍燒鐵春香粉等業生意微薄商欲為盜聞得發兵拘拏各人出來投首求生實未有刦過村莊等語臣查驗各犯俱係壯年若令回籍安插未必始終安分若欲處治伊等既屬自首又均供並未行刦現在亦無發覺之案臣因挑選人材壯健之馮友順等七名分發臣標充伍食糧溫盛開等十三名分發各鎮協營食糧均令其用

命捕盜其廖文普等十四名因順德等縣巡緝私
鹽向設巡丁給發口糧臣即發令充當使有拘束
臣於賊犯不敢寬縱今因其投首向化自新是以
酌量羈縻視其後來果能出力即為有用若有違
犯立可處治是否有當合行

奏明請

旨臣謹

奏

卿留心緝盜實屬可嘉如此料理安插亦屬得宜但聞
粵東向年督撫輩已有先此行之者無如兇徒率皆積
年刦擄為生飲酒食肉習慣成性不甘營伍之勞苦淡
泊旋復逸去為匪如故更因此輩盜賊出身入伍食糧
未免為衆所賤每不能日久相安要當詳審為之恐暫
時羈縻終貽地方異日之累不可不預為防範也朕意
謂此等兇徒匪類竟無可寬恕不若盡法懲處為上餘
無他策然似此自首並無行刦之案者則又當一論耳

惟慈祥二字斷不可施之於盜賊貪吏切戒切戒

同日又

奏為奏明事竊臣准刑部咨開雍正五年十二月初五日准正白旗漢軍都統咨稱本旗劉漢傑佐領下工部尚書兼都統黃國材名下應追捐穀等項銀共二十五萬餘兩一案據黃國材呈稱賠項甚多無力完交所有各處房地家產盡行變賣以完賠項茲有從前交過兩廣總督孔毓珣銀七千兩

代置房地即係制臺族人之產俱在山東地方我
係旗人不便前往守賣理合開單呈明咨部轉行
將我山東房地仍交代置之總督孔毓珣查收將
原價銀七千兩照數還給奏解賠項等情轉咨到
臣竊臣於康熙五十六年間任廣西按察使時今
尚書臣黃國材前任廣西布政使與臣同寅黃國
材曾托臣代覓山東產業臣再三推辭迨後臣家
人韓啟因染病回家黃國材聞知又欲差人同往

臣云爾公子黃炳現任山東臬司何難尋覓黃國材云他既現任不便出名我已寫諭叫京裏辦理家人到山東候我這裏自己差人送銀去並不要你的家人經手置買只要他向牙行裏說一聲等我家人自己成交有何難處等語臣因同寅中不好推托曾囑臣家人韓啟說知牙子事則有之今黃國材忽稱交過臣銀七千兩代置房地係臣族人之產請將房地交臣查收給還原價殊可駭異

查產業原非臣為伊代置自應仍令伊原經手家人覓售若以臣住居山東而隨憑空壓受殊非情理但臣從前囑臣家人帶信傳說亦屬不合臣情願備銀一千兩交黃國材添完追項以罰臣從前不慎謹將情由據實

奏明伏乞

皇上睿鑒謹

奏

此事黃國材大錯矣朕已諭伊自行料理兼諭該旗部
辦理此事者矣據奏助銀一千尤屬不可卿如此毫不
顧忌據實陳奏朕甚嘉之可謂深知朕意至卿凡所辦
理奏聞之事寬嚴適中尤愜朕懷朕實嘉悅之至勉之
莫移此志

雍正六年三月二十二日兩廣總督臣孔毓珣謹
奏為奏明修葺沿海礮臺營房事竊查廣東沿海營
縣設立礮臺經前督臣楊琳

題明着各州縣時加修理入於交盤案內出結申報
嗣因沿海地方風雨較內地更大礮臺營房易於
損壞各州縣雖有交盤之名終少修理之實臣查
海防關係緊要不便任其遲緩於上年十二月內
分檄嚴飭各府委官協同營員勘估并查點礮藥
器械去後今已據各府申報前來各縣有已經修
理完工者有現在興修者有尚未興工者其需用
工料無多之礮臺營房各州縣自為修葺其有礮

臺多而工料繁者州縣力不能修恐有遲誤臣亦酌量幫給修葺俟各處工完之日另行奏

聞合先

奏明臣謹

奏

海防緊要如此留心甚好實力為之務期與所奏相符

同日又

奏為奏明分賠廣西司庫俸工銀兩事竊據廣西布

政使郭鈺詳稱粵西雍正元二兩年俸工銀兩內
有前司王沛懽護司張若需前司劉廷琛任內餽
送

欽差并主考路費共支用銀九千七百八十兩俱係酬
應交際之費並非地方公事不便開除查前司王
沛懽等支用銀兩之時俱在院臺任內是否院臺
與前司公同支用應否補還惟候批示等情到臣
臣查各省捐解俸工於雍正元年九月十一日奉

旨停止臣廣西巡撫任內未提州縣耗羨地方應辦公
事將未經奉

旨停止以前提貯司庫之俸工公議照依向例支用今
廣西布政使郭鉞所詳支送

欽差并主考路費共銀九千七百八十兩實臣任內與
正署布政使公議動支之項該司以為酬應交際
之費不便開除乃慎重庫項殊為公當臣名下應
分賠銀四千八百九十兩現在湊發廣西布政使

貯庫外至此項俸工解支已久官役無可給還廣
西地方公事現有提解州縣耗羨二分辦應無所
支用相應報部充餉所有臣認賠銀兩緣由理合
奏

聞臣謹

奏

知道了但此項銀兩不應報部充餉仍存之奉省以為
地方公用可也

同日又

奏為奏

聞撥兵擒捕西隆土目事竊查廣西西隆州之八達寨其地山深而險有土目顏光色顏光東弟兄最為頑惡今於本年三月初五日准廣西提臣田畯咨據署上林營守備呈稱顏光色顏光東於正月十八日帶領土蠻千餘與弄忙亭尋仇擄去者莫者崗等寨人口牛隻殺傷人命至今不肯解散請撥

兵擒捕等語臣隨經咨會提臣撥發官兵會同該
地方文武務期將為首之顏光色等擒拏到案并
知照貴州安籠鎮臣蔡成貴於黔滇交界營汛堵
禦以防遁逸俟捕獲之日究訊另行具

奏外所有臣飭撥兵丁擒捕土蠻緣由合先奏

聞臣謹

奏

據各提鎮等業俱奏聞矣事關撥兵剿撫須當詳慎辦

理

同日又

奏為奏

聞協捕楚省賊徒事竊臣據廣東連陽營遊擊趙國志稟稱本年二月二十一日准湖廣永州鎮標左營遊擊公移據寧遠汛把總稟據生員荆之寶報稱本年二月初一日夜被大盜數十餘人各執鎗礮蜂擁入家擄去姪男五人殺傷男婦三人現帶兵

丁搜緝希於接壤隘口堵禦擒拏等因前來隨飭
附近楚省交界汛弁帶兵堵擒去後嗣准永州鎮
標遊擊署臨武營叅將張起鵬公移內開據永州
鎮標營員帶領馬步兵丁到寧遠縣移稱前行刳
荆之寶家賊夥嘯聚深山地名楠竹坪地方查道
州江華越嶺即係藍山所轄本月十八日經左營
楊遊擊帶兵進剿失利聞得賊衆意欲潛逃希飭
所轄各汛弁嚴加堵禦擒拏等因准此卑職除再

委把總帶兵星馳於楚省藍山交界地方堵禦外
理合稟報等由到臣臣即檄飭三江協副將張傑
連陽營遊擊趙國志速令備弁督兵飛馳分布協
捕復檄文員帶領捕巡練役探緝并委標員星往
持文守催督令文武堵禦協捕外合行

奏明臣謹

奏

湖南此案情節據該省文武俱經奏聞矣料理甚屬周

詳妥協

同日又

奏為遵

旨稽查採辦木植事竊臣接怡親王及大學士等寄字

內開雍正五年十一月二十九日奉

上諭各省採辦木植等項俱著該督撫遴選賢員辦理
照民間價值給發不許絲毫扣剋時加察訪倘稍有
不遵必將該督撫一并從重治罪欽此欽遵寄信到

臣

查廣東採辦木植係遴委廣南韶道林兆惠

敬謹辦理查廣東木植產於清遠縣之黃華崗吉

河從化縣之大坪三丫塘等處深山據該道稟稱

從化之木係仙娘溪五寨居民公山清遠之木官

山與民山各半屢喚鄉民領價俱稱此係

萬年吉木小民受

萬歲深恩報答不盡斷不肯領受價值今奉

皇上聖諭又復再三勸導據稱既然

萬歲如此恩典我們公議俟這地方共採過合式木植若干一總公領價值等語其價照時值估計候給領後冊報至於一切打造器具工匠與砍木運木人夫等項俱照民間工價給發並無短少等語臣留心訪查果無尅扣其廣西省採辦木植尚未據有報到所有臣欽遵

聖諭并現在採辦無尅扣累民緣由合行

奏覆臣謹

奏

果如所奏甚好此番採辦木植若令小民有一人含怨
日後聞於朕耳卿追悔莫及一切動用錢糧寧費毋省

同日又

奏為遵

旨奏覆事竊臣前奏西洋官商在澳門慶祝

萬壽又聞御史常保住廉靜待夷人得體一摺奉到

硃批臣跪讀之下惶悚靡寧臣查常保住伴送西洋使

臣麥德樂來廣臣駐在肇慶來回俱未會面因問
之見過常保住之署南海縣知縣周天成據云其
人安靜待西洋人和氣臣又聞省城各官公送程
儀八百兩常保住不收臣以一時所聞遽以廉靜
得體具

奏實為愚昧茲奉

聖諭臣欽遵細行密查常保住伴送麥德樂回廣除勘
合口糧夫船之外每站另有幫貼夫船其經過廣

東各站伊之前站家人抄填勘合索銀二兩小包銀三錢亦有得銀四兩者座船吹手厨子火夫視站之遠近各縣額外幫貼銀數錢以至數兩不等額外水手人夫二百二十餘名每名幫銀六分以至一錢不等常保住回京除勘合之外亦另有夫船前站家人抄填勘合亦仍需索銀兩厨子等項亦有幫貼其在澳門收受西洋人食物則人皆知道收受西洋人是何禮物則外人不知至待西洋

人過優亦甚失體理合據實奏

聞至臣前因傳聞未確遽爾入

奏愚昧之罪實無可辭合併陳明仰祈

聖鑒

臣謹

奏

似此或出於無心則可若係有意將母遺忘去年陛見時所立之志向耶

同日又

奏為請

旨留存礮位以裨邊海事雍正五年三月內准兵部咨各省於一千兵內設立子母礮六位威遠礮四位本省倘不足用將就近省分移取岳鍾琪現送來之威遠礮挨次遞送令各省照式揀選存留餘剩威遠礮子母礮解送來京等因又於雍正五年十一月內准兵部咨各省舊存及捐造子母礮查明悉行送部至礮位為軍中必需之器除威遠礮外

尚有何項衝擊便利詳細造冊到日按冊酌撥以符原議一千兵十位之數等因奉

旨依議各處應設礮位俟撥給齊備之後將彼地所有子母礮齎送來京交部欽此除移行欽遵查報外臣

查廣東廣西礮位雖無威遠礮名色而現在准遞送到陝西之威遠礮驗其體式並加試用與各營現存之行營礮大概相等無庸另造其子母礮一項廣東廣西現有者少而相似者多如砂礮河塘

礮斑鳩礮每礮一位俱帶有子礮三四枚雖形式較異於子母礮其實為用與子母相同兩粵山海邊地攜帶巡防輕便利捷莫過於此且外海內河哨巡船隻衝擊之便尤所必需現據各鎮協營紛紛呈請存留前來相應懇請

聖恩俯念兩廣實係邊海要區水陸營伍關係緊要准將子母礮砂礮等項一體存留或止將子母礮一項解部其砂礮河塘礮斑鳩礮准令照舊存留臣

為邊海起見是否可行不敢冒昧具

題合先具摺請

旨遵行臣謹

奏

此事甚有關係現將奏摺抄發廷臣會議候旨遵行

兩廣總督臣孔毓珣廣東巡撫臣楊文乾謹

奏為遵

旨會議漁船事宜事雍正五年五月初十日臣孔毓珣

等在京奉

皇上面交撫臣楊文乾覆奏廣東漁船一摺

聖諭著臣回任同撫臣楊文乾會商具奏欽此今查撫臣楊文乾所奏諸條定例現行者實應再加整飭未備者會同斟酌謹逐條會商定議仰祈

聖鑒

一漁船陋規與販運米穀出洋一條臣等遵照定例歷經飭禁恐有陽奉陰違應照楊文乾所奏將

陋規開明勒石永禁責令文武互相稽察按季出結庶各員咸知儆惕

一網繒大船站洋一條查網繒漁船樑頭過小即不能捕魚應照楊文乾所奏嗣後成造此等大船樑頭不許過八尺其從前違式者限三年內改造不許久出站洋至於小漁船仍照舊制樑頭不得過五尺蓋板披水不許裝釘本港採捕務令朝出暮歸違則按法重處

一漁船報官印烙編甲一條查漁船成造時地方官先取保結裝成後驗明印烙給照每十船編為一甲俱係定例今楊文乾稱有私造無照之船在港行駛深恐日久法弛應照所奏再加嚴飭編甲查點造報稽核

一禁多帶淡水一條查出洋必帶淡水若禁其多帶可杜久留海面之弊應照楊文乾所奏禁止至於海船風篷俱視船隻之大小長短製定其油飾

書號業經奉

旨遵行今應再加通飭

一小船本港採捕每日帶米一升五合嚴禁夾帶
軍器硝磺等物一條查粵東漁船向來每人每日
帶食米一升餘米一升今楊文乾所奏米數相去
無多無庸更改至於小船止令本港採捕朝出暮
歸并禁夾帶軍器硝磺等物俱係定例應如楊文
乾所奏再行申明

一富戶製造船隻租賃務報本名一條查製造船隻雖例係地方官取結查驗但有本戶恐日後事累捏造詭名難保必無應照楊文乾所奏再行明白申禁

一改定漁船換照之期一條甚為有便漁民應如楊文乾所奏每遇一官到任換照一次以免每年換照漁民守候之苦臣等再請換照必於正任之官其署印官不許換照以杜重複并可免署官擾

累之弊

一各口岸派撥州縣民壯三四名或五六名協同
兵丁巡邏一條查沿海口岸甚多各縣民壯無幾
臣等再議與其派撥民壯不如令文職州縣一體
查察若守口弁兵需索許各縣照依將備一體揭
報如無需索令各縣出結送查倘有捏結查出并
以徇庇叅處

以上諸條原係叅酌成例臣等遵

旨定議如蒙

聖恩准行臣等即逐條明白分晰出示申明不必另行

具

題伏乞

睿鑒批示遵行臣等謹

奏

所議殊屬妥協准照此行爾等酌量若無應行報部之處可以不必具題

雍正六年四月十一日兩廣總督臣孔毓珣謹

奏為奏

聞廣東早禾栽插遍滿事竊照廣東入春以來雨水調
勻早禾已插三月內連得大雨凡遠近高低田畝
無不霑足民間俱稱今年雨水得時早收可冀大
有是

皇上敬禮

龍神之應驗等語至麥子油菜收成俱好地方亦安

靜恐塵

聖懷理合奏

聞臣謹

奏

覽奏雨澤應期深慰朕懷凡為督撫者果能一秉公正
實心教養兵民

上天之護佑朕可力保人多視為杳茫奈何須知人
神交感之理捷如影響信得及一分獲一分福信不及一

分受一分禍但肯實力體驗自當然會也

同日又

奏為奏覆事雍正六年二月二十二日接怡親王及

大學士等寄字內開禁用黃銅

上諭一道到臣欽惟我

皇上至聖至仁體恤民隱無一不周今以日晷儀器之
類來自外國古銅香爐花瓶造自前代鎖鑰櫃箱
上事件用銅無多只禁其販賣不令搜索民間又

恐臣等奉行不善

特諭寄信前來臣等欽遵酌量據司道會議收銅事宜
實屬不寬不嚴民間並無苦累查廣東省據驛道
何師儉二次具報共收買過黃銅器皿六千九百
二十五斤十兩廣西省據布按二司申報收買過
黃銅器皿七百二十斤俱於撫臣衙門造冊報部
我

皇上便民利用之

聖心臣等自當敬體欽遵合行

奏覆臣謹

奏

覽奏已悉但兩省所收銅斤為數何故甚少

同日又

奏為奏覆粵西文職事竊臣上年

陛見欽奉

皇上面諭將廣西省文職官員開填考語具奏臣回任

後細加訪查并有親自驗看者除司道大員俱在
皇上聖鑒之中無庸開列外其府廳州縣臣謹具考語

彙併一摺另呈

聖覽臣謹

奏

所開廣西省府廳州縣職名一摺留中至司道等大員
朕只知其在京不知其在任如何但悉其已往未悉其
以後如何亦應開列呈覽其廣東省人員一併開列具

摺奏來

同日又

奏為奏明廣西再加節省羨餘事竊臣上年以酌請積貯穀石等事

題明廣西鹽斤官運官銷彼時以事在創始需用頗繁各屬領銷鹽斤每包酌支火足銀三錢今行之已久細加查核三錢之內可以節省銀一錢每年共可節省火足銀九千三百兩零請即動用於墩

下白沙建倉貯穀接濟竈丁此後遞年將節省銀
兩歸公充餉在案茲又據廣西鹽驛道張體義詳
稱查廣西鹽務自雍正二年內奉行官運事創用
繁今已行四年運銷熟悉其各運官養廉工火夫
腳雜費及運鹽水腳等項俱可節省平頭銀色亦
稍有羨餘統計每年尚可節省銀四千兩理合詳
請

奏明充公等情到臣據此相應將該道詳稱之節省

銀四千兩並前項節省銀兩彙同西省官運官銷
羨餘銀兩一併歸公充餉合行

奏明臣謹

奏

覽

張體義人甚敏練且聞其聲名好實心任事

同日又

奏為奏

聞緝獲楚省賊犯事竊查湖廣寧遠縣生員荆之寶家
被盜刦擄殺傷官兵臣據報檄飭廣東連陽營并
連州文武飛撥備弁兵役於交界地方協力擒捕
并委標員前往督催將緣由奏

聞在案今於四月初八日據廣東連州知州朱振基詳
稱三月初九日差役黃昌在連山縣宿塘墟緝獲
賊犯梁國太梁國安二名交連山縣收監又在湖
廣廣西交界楚洞地方緝獲盜犯覃貴元即覃阿

乾解州卑職細加訊問據供為首大哥是韋廷耀
二哥是韋廷祥同夥共一百四十人二月初一日
夜打刦荆之寶家得銀四百兩并衣服紬緞又捉
了他兩個男人一個女人二月十八日同官兵打
仗小的們夥內陶亞德李宗秀等十二人被官兵
殺了那官兵不知殺了幾人小的們於二月二十
七日在錦田大山各人逃散等語除一面密緝夥
黨外合行報明等情到臣據此除分檄廣東廣西

交界地方文武再行嚴加緝捕并將已獲盜犯起
解楚省歸案究審外所有拏獲楚省盜犯訊供緣
由合行奏

聞臣謹

奏

嘉悅覽之直省封疆諸臣咸肯如此不分爾我同心協
力整飭此種匪類自當斂跡不敢肆行矣朕覽前奏已
知辦理妥協料若輩不能漏網餘犯務令竭力緝捕毋

致一名免脫更宜詳察有無捏報情弊勉為之如晉省
翟斌如一案河南總督田文鏡之辦理可嘉之至當效
法之

諭兩廣總督孔毓珣聞粵東廣南韶道林兆惠於六月
間差役往從化山採買木料被盜擄去十二人放回四
名寄信勒要規禮數百兩始准贖回又聞五月間大盜
數百商謀行劫苦無器械羣至龍門營之七子汛搶奪
兵器在汛官兵三十餘人避匿不敢出敵任其席卷器

械而去遂往各鄉肆意行劫失案纍纍阿克敦並不具題亦不嚴飭緝捕反暗囑有司止令捏報十餘名審作兵丁睡熟致被偷竊因而薄責兵弁苟且了事又聞五月內高州府電白縣山中聚盜千餘白晝沿鄉搶掠竟至一日之內連劫二十七家練勇往追被捉入山割去兩耳放回寄信令勿再追且聞將軍標兵窩盜分贓常賚咨提質審將軍不惟不革兵糧發審囑令審作誣良常賚瞻徇情面竟不再提亦未奏聞地方上傳為笑談

以故匪類公行無忌常賚署中亦皆被盜失去摺匣鑰匙轉向將軍石禮哈借用諸如此類該撫該將軍概行隱諱不奏省會之中盜賊竟敢如此肆橫文武大員所司何事無怪家家寢不安枕民間有孔督去阿婆來盜結黨民何賴之謠夫設兵原以衛民而總督將軍實掌督兵之權今阿克敦石禮哈乃如此弛縱隱諱以致盜賊捉人割耳搶兵器械甚至一日刦掠數十家撫署亦經失事又復通同欺隱朦混似此負朕深為可惡爾其

詳悉查究奏聞

雍正六年五月初九日兩廣總督臣孔毓珣謹

奏為備陳疎忽情由仰祈

聖鑒事竊臣欽奉

皇上諭旨并接怡親王大學士張廷玉等寄字轉傳

諭旨令臣將廣南韶道林兆惠採買木料被擄人勒贖

等五案與巡撫楊文乾查審務將實情究出具奏等

因欽此臣與撫臣逐一會審除分案具

奏外內臣疎忽情由當另行據實陳明認罪查廣南
韶道差役何英等於上年六月十四日木廠被刦
雖係署督臣阿克敦任內之事而題叅疎防係臣
回任之後臣以限期已逾按察使身任刑名詳內
既稱查明諒屬無悞隨不經意細查阿克敦任內
原案即行據詳具題罪無可逭本案盜犯係屬礦
徒所搶皆是食物捉人放回未得銀兩亦無損傷
當時官兵擒捕傷故盜犯十九名現獲二十一名

各犯有供行劫木廠者有供曾於五月內行劫長寧縣陳錦成等家者俱經題叅疎防之案臬司方願瑛詳請分案完結雖非縱盜而刪去勒贖等項情節實屬違例又督標貼防新會縣龍門七子汎被劫軍器一案阿克敦署任時道府等已審作竊賊完結臣回任後未據各屬將改竊情由稟知是以未經補叅罪實難辭又電白縣蔡文瑞等家於上年五月十一日被劫縣詳據事主呈詞十三紙

共二十七人內中多有同姓係阿克敦署任內之事而題叅疎防亦臣回任之後臣亦以疎防逾限按察使所詳諒必查明情實因不加詳對原案匆忙據詳具題疎忽之罪無辭臣向無縱盜之心今以不加詳慎竟至與人並蹈愆尤負罪實深惶悚無地俟臣審

題之日於疏內請

旨勅部嚴加議處合併陳明仰祈

聖鑒臣謹

奏

據奏已悉業既審出實情未有不可恕之過也候題到日降旨審案數摺留中

雍正六年五月二十四日兩廣總督臣孔毓珣謹奏為奏

聞驅捕礦徒事竊查廣東惠州府歸善縣之白馬山石門仔山又永安縣之鐵嶂山報有礦徒聚集偷挖

礦砂文職官役不能驅捕臣咨會撫提二臣檄行
司府飭令歸善縣親往曉諭一面行委惠協副將
及提標遊擊各帶兵丁於各處山場查拏雖現在
未聞滋事而聚黨人多不得不早擒捕俟捕獲
之日臣等會商懲治外所有臣撥兵驅捕礦徒緣
由合行奏

聞臣謹

奏

知道了必應驅逐解散毋因循毋憚煩

同日又

奏為奏

聞粵東早稻豐收事竊照廣東地方田禾豐茂經臣奏聞在案今歲雨暘時若廣東十府一州早稻十分豐熟現在收割登場者約有三分之二米價平減理合奏

聞至廣西地方雨水調勻田禾亦俱豐茂臣謹

奏

早稻豐收深慰朕懷以手加額覽之汝等督撫一分吏治一分年成此理朕實見透其加敬加勉

同日又

奏為奏

聞欽差到粵日期事竊安南國奉

旨錫以四十里之地

欽差由粵前往據左江道閻純璽報稱

欽差杭奕祿任蘭枝於四月十九日到南寧府寓於公館准該國王柬文以溽暑懇迨秋初迎接蒙

欽差面諭今雖天暑但奉有

聖旨敕諭不敢稽遲本道咨覆該國王在案合行具報等情臣又接據安南國王黎維禰柬稱亦同前由到臣經臣照會該國王

欽差已到迅速迎接俟出關之日另行

題報外所有

欽差到粵日期併臣照會該國迎接緣由合行奏

聞臣謹

奏

此事何煩催促識見小哉

同日又

奏為據實奏

聞事雍正六年四月二十三日欽奉

皇上批回臣奏覆審理肇高道王士俊具揭解任布政

使官達等一案奉

硃批秉公審理據實奏聞欽此臣等行據司道等審解
前來即與撫臣楊文乾將軍臣石禮哈公同會審
另疏具

題并將臣等從前不草陋規請

旨勅部議處外所有審訊供由另單恭呈

御覽至於撫臣楊文乾先後叅劾官達各案容臣秉公
審明之日另行具

題臣謹

奏

所奏知道了具題到日再降諭旨百凡處惟貴秉公據實迎合二字不惟悞事日後亦且自悞慎之毋忽

同日又

奏為恭請

聖鑒事竊查廣州府理瑤同知陳鴻熙於本年四月內委署惠州知府印務有海豐縣葉亞益人命一案

二叅限滿現在具疏

題叅例應離任聽候議處臣等查陳鴻熙辦事勤敏其署府之時本案限期止餘八日於五日內審轉其過尚有可原謹仰體

皇上愛惜人材至意不揣冒昧瀆

奏可否調令引

見出自

聖恩臣等謹

奏

此奏甚是候降旨諭部汝等但能秉公據實何慮屬員不知敬畏屬員果皆知感知畏曷禁不止胡令不行耶肯效法田文鏡之居心行事朕自然信任不疑倘稍有
一二私見未融則志慮不純難以傾信彼此皆無益矣
惟當矢諸

天日屏盡私腸自蒙

上蒼鑒照朕亦必能覺察此乃為人臣之第一良法餘無

二策如欲成全此身做一千百年不朽人物只在一公字而已勉之勉之

雍正六年六月二十八日兩廣總督臣孔毓珣謹

奏為奏明委撥臣標叅將督捕西隆土目事竊查廣

西西隆州八達寨土目顏光色兄弟逞兇不法遣

撥官兵會捕臣經具摺奏

聞茲准廣西提臣田峻咨會撥發右江鎮思恩協隆林營兵七百名委遊擊常顯虎統領同提標守備熊

文舉帶領千把於三月二十八日自泗城皈樂起程又撥田州土知州岑應祺帶領土兵三百名俱於四月十二日至羅英地方有周邦寨係顏光色長子所踞率克拒敵四月十六日官兵攻破周邦寨傷死土蠻五人擒獲四十一名官土兵丁各被傷一名十八日移兵至八達之前山嶺十九日土惡衝敵被官兵鎗傷數人遁回因八達地方山巖險固官兵雖週圍分佈一時未能攻入四月二十

一日將泥洞土目蘇亞養即蘇文斌捕獲五月初五日惡黨岑扭投首到營旋即病故五月初十日西林知縣韓三善率領土勇奪取山梁殺死惡黨三人官兵夾攻亦礮傷惡黨三人土勇被傷二人五月十四日官兵進攻鎔礮傷斃惡黨十餘人土兵傷故四名十八日官兵進攻鎔傷惡黨八人傷故官兵一名土兵二名連占數處山峯因路徑甚多天時暑熱惡黨時出時沒且欲攔截土兵口糧

土知州岑應祺已撥添土兵四百名等情又據右
江鎮臣段宗岳呈報咨會左江鎮臣齊元輔撥中
軍遊擊鄔元度帶兵三百名合擊等情臣先後檄
催右江鎮臣段宗岳星飛親往調度查臣標後營
叅將武繩謨頗諳軍機臣於六月十六日即委該
叅將飛往軍前相視形勢飛報如有委用該叅將
之處即聽右江鎮臣委遣并囑詳慎辦理相機進
取務將蠻惡捕獲淨盡以靖地方理合奏

聞臣謹

奏

此番進勦官兵甚屬不堪所奏尚未盡其情狀或汝被伊等瞞過亦未可定事竣之日嚴察叅處以儆將來須知悞事緣初次已失機宜與續調官兵無涉

同日又

奏為奏

聞事竊查廣東早收豐稔米價平減惟是五六月間天

人口

曾有傷損否

氣暑熱廣東廣西民間多有暑疾又廣西桂平梧
等府地方六月間各有少雨之處今於六月二十
三四五等日連日大雨霑足暑熱少減疾亦漸愈
我

皇上念切民依合行奏

聞臣謹

奏

頃聞粵東通省大熟今覽此奏殊不相符

同日又

奏為奏

聞礦徒解散事竊臣准廣東提臣王紹緒咨會據提標
遊擊趙一廷惠協副將鄂萬報稱會同文職帶領
兵役齊進白馬山礦徒聞風先已逃散隨將寮房
燒燬隴口填塞又至石門仔礦徒亦先解散已撥
弁兵在該地巡守其餘官兵回營至三甕竹地方
查有銅一百六十四包頓貯謝飛萬店內稱係糧

道差人採買再白馬石門仔二處礦徒雖係陳大
肚等領衆偷挖實係高仕登蔡隆為首業經拏獲
等由又據提標中軍叅將姚源忠稟據惠協千總
陳啟稟稱奉差前往三兜竹又搜出銅二十七包
今同糧道家人及店戶謝飛萬一齊押解來惠等
情除交惠州府收審外相應咨會等由又據惠協
副將鄂鼐報稱差員會同文職各帶兵練前往鐵
嶂山查拏礦徒已經逃散淨盡等情臣除行廣東

按察司將為首挖礦之高仕登等嚴審并查現獲銅斤是否糧道何師儉辦銅差人採買查訊明確定擬解撫臣楊文乾審究外所有礦徒驅捕已散緣由合行

奏覆臣謹

奏

何師儉此舉是何心耶此處絲毫不容瞻徇傳諭楊文乾據實察審地方上凡遇此等事不可因循養姦必將

類斯者整飭數件其餘自當畏法斂跡不敢為匪矣封疆大吏姑息二字隱飾二字所關甚巨戒之毋忽切不可忘去年面諭之旨更不可移面朕所立之志

王紹緒何如克勝此任否田畯暨伊二人朕深慮其不及據實奏知陳祖訓亦當留心訪察恐非實心任事之人

同日又

奏為奏

聞事竊廣西那地土州逃犯羅烏羅將等原與該土知
州羅會禧一族彼此尋仇構釁及至擒捕羅烏等
每逃匿於貴州都勻府平州土司楊武功處案經
年久今據陞任按察使張元懷詳據慶遠府知府
徐嘉賓詳稱羅烏等帶黨百餘騷擾村莊今盤踞
於龍葛崗羅中興主謀又有楚棍七人為羽翼土
知州羅會禧帶兵捕敵被羅烏捉去哨總一名殺
傷土兵二名該土州請撥隣近土兵會捕前來除

飭東蘭南丹二土州撥發土兵會捕外合行詳報
等因又准提臣田駿咨同前事各到臣即檄行
該地文武速飭南丹東蘭那地各土官多撥土兵
協力擒捕去後茲准提臣咨稱羅將一犯於貴州
平州土司地方拏獲等因除再嚴飭各該文武務
將羅烏羅中興等逐名擒獲究治外合行奏

聞臣謹

奏

覽

田峻何如能稱厥職否其新任副將董芳凡有擒克剿賊冒險之處不必令往將此諭亦密令提臣撫臣等知之

雍正六年七月十八日兩廣總督臣孔毓珣謹

奏為奏明事竊廣東粵海關徵收稅課係撫臣衙門經管臣聞前撫臣楊文乾於夷船稅例規禮之外又於洋行另有所取今臣署理撫篆問之管關官

役俱云不知詳細臣傳洋行密問據稱此事實屬

此皆捏造但並非規禮上年署撫院常賚阿克敦即無

此項臣詢其楊撫院是言萬不可信楊文乾秉性少

覺禍急則有之其實心奉公一節甚可取據稱貨物上船

年一切處常保全伊成就一全人此八人朕甚惜之其身

後事

三千不加以全恩常領悉朕意三萬或包銀八千六千

院與洋行另有交往則加一抽收俟貨物上船繳

送者其銀係番錢九一二成色行中自赴撫院衙

門兌交外人並不知道今大人署印我們俱情願幫助公用照依夷船每隻大小估送但懇求不可併入羨餘致成定例等語臣思此項銀兩既出自行家情願似可順伊繳送於錢糧有益至於夷船之來全憑行家招致今伊等不願併入羨餘臣請照所收數目解進

內庫以備

楊文乾在時亦有繳內庫之項不知即係此項否查明恩賞之用似可不必傾銷致有折耗或仍行傾銷足色

再行請旨
解進恭請

批示遵行臣謹

奏

覽

同日又

奏為奏明委管關稅事竊查廣東巡撫兼管太平粵
海兩關其太平關稅務經前撫臣楊文乾委韶州
府知府吳騫管理粵海大關稅務委廣州府知府

聞張

張銷人甚不及多有言其不能勝任者果然否惠潮各口委惠潮道樓儼高雷廉瓊各口俱

委各該知府管理俱經

題報而各關稅多之處俱係楊文乾自差家人同胥役坐口經收今臣接署印務竊思錢糧關係重大不敢輕託家人經手致生事端隨將各稅口照前撫臣原委各官檄令專管督同胥役經收但各海口相隔遙遠恐有胥役通同作弊臣飭附近各口將備千把不時密行查察而廣州府首郡事繁知

府張銷經管粵海大關查察難週不無疎漏臣標
水師叅將黃錫申勤慎誠實令其協查同收臣因
但在得人何分文武稅務重大一時權宜故令就近武職協同辦理
合

奏明至於兩關雜項陋規以及總管內司等項名色
臣既不差家人一併照數歸公斷不敢絲毫欺隱
俟臣交印後將收過數目具

奏臣謹

奏

此等稅務細事卿有何不見信於朕耶

同日又

奏為請

旨事雍正六年七月十四日准吏部左侍郎臣阿克敦
咨內開為移咨事雍正六年六月初十日准部文
奉

旨阿克敦仍回廣東有奉旨交與楊文乾詢問阿克敦

各事件俟詢問清楚阿克敦來京欽此遵於七月初二日到廣當即赴巡撫衙門就問楊文乾因病不能相見旋即身故問伊第二子據稱一應

硃批諭旨俱經封繳等語今貴部院署理撫篆有無准到原任巡撫楊文乾交送事件請煩查照示覆等

語臣於七月十四日據楊文乾次子楊應琚封送從前阿克敦常眷咨覆楊文乾印文各一件到臣查俱係答覆楊文乾詢問粵海關收過稅銀之事

又據撫院書吏林廷顯稟稱七月初四日楊前院
內署發出前撫標遊擊丁銓生未批詳文一件司
道印票一件繳送察核等情臣查詳票內俱係阿
克敦之家人王姓索取暹羅國船規之事未知此

即此二事關稅船規二項是否即係楊文乾奉

旨交問事件今阿克敦應否令其進京

皇上勅部訊問抑仍留廣東候

旨差員查訊理合請

旨遵行并將司道會訊口供印稟遊擊丁銓生詳文阿

克敦常賚回文抄錄恭呈

聖覽

臣謹

奏

候欽差前往會同爾與署撫將阿克敦常賚各案嚴行
查審務究實情具奏二人深負朕恩朋謀傾陷楊文乾
甚屬可惡汝若不屏除瞻顧之心謂楊文乾已故若輩
現存少為之用意周旋則汝又忘去年之面諭矣寧嚴

毋寬不得絲毫遷就以圖了事

雍正六年八月初四日兩廣總督臣孔毓珣謹

奏為遵

旨奏覆事竊臣前奏覆收買黃銅器皿一摺奉到

硃批臣謹祇受竊查廣東收買銅器省城設立公所委
糧驛道何師儉專管其事各州縣俱於司庫領銀
自行收買按季彙解省城今臣詢問何師儉銅斤
收少之故據稱廣東係銅錫並用之地收買價值

並不短少而收解寥寥者因未曾立限嚴查民間以現成器皿仍然藏匿私用不肯繳官必得立限嚴查將地方官加以處分庶幾官民仰遵

功令等語臣查收買銅器之少實在民間隱匿不肯繳官我

皇上體恤民隱不令滋擾臣不敢過嚴然聽其自繳終屬無多臣今復通行示諭愷切勸導令民間速繳領價如再隱匿不遵治之以法并飭各府州縣實

力奉行以期寬嚴並用理合

奏覆臣謹

奏

此事在粵可以不必過嚴朕前批諭黃銅數少不過偶
爾間問禁銅原為銷燬制錢起見廣東等處出產銅錫
之省諒無此事俱無庸過嚴但亦不可置之不問當勤
加勸諭而不專繩之以法官亦不必叅處惟向屬員耳
提面命不時申飭分別其勤惰而勸懲之可也

同日又

奏為奏明曠軍田地餘米歸公事竊廣東從前設有都司衛所管理屯糧屯丁因有逃亡故絕田地拋荒衛所各官自備工本招民墾復給與佃耕每年百姓按畝輸租除完額糧之外餘羨米穀謂之曠軍餘米衛官收作養廉今廣東除沿海緊要存留八衛所其餘已裁併州縣此項餘米應清出歸公臣檄行布政司轉飭各府清查茲據布政司詳稱

廣惠潮肇高等府屬共曠軍餘米五千六百石穀
一千六百九十餘石錢三千二百文臣先行具

題歸公其未據具報之各屬飭令自首到日另行具

奏臣查此項曠軍田畝每年收租非屬經久之道若

以此官田僅照點省頂耕之例止上稅銀五錢即

給為業亦非情理之平臣再四酌量不若令民承

買變價歸公臣現飭各屬將田土查明上則下則

照時值收價充餉其未有承買者仍行收租歸公

既有益於百姓復有益於

國帑實為兩得合行

奏明臣謹

奏

此項田地照他省之例仍存作官田收租以脩公用為
是何必令民間承買耶此舉可以不必

同日又

奏為奏請酌撥汀引速清餉項事竊查福建汀州府

屬八縣引鹽經臣

題請改歸府縣官協辦之後因連年雨水偶多鹽場少產兼以正署交代轉運稽遲以致雍正元二三年共欠餉銀四萬九千四百餘兩經前署督臣阿克敦以請定汀屬引鹽銷售之法等事具

題准部咨覆將汀屬引鹽以雍正四年為始仍照前督臣楊琳辦理之法發帑融銷委員辦理并將前項積欠銀兩作何勒限分年帶完之處妥議具

題其每年帶完舊欠之外應有羨餘若干亦照例據

實查明奏

聞充餉等因臣隨行據鹽運司史在甲詳據署潮州運
同陳鴻熙詳稱請將汀屬新舊引目每年分為新
七舊三撥帑兼銷統俟三年之內銷清積欠每年
十分之額鹽以七分運銷新引抵足全年之新餉
其三分運銷舊引帶完雍正元二三年之積欠至
於羨餘無從議及俟帶完舊欠清楚之日全運現

年新引再行查明核定羨餘實數等由轉詳前來
經臣覆核具

題在案今准部覆內開從前楊琳將兩廣積欠課銀
九十一萬餘兩題請分作五年帶完除額餉并每
年帶銷舊欠之外歷年尚有羨餘題報今汀屬引
鹽既照楊琳之例發帑融銷則未完積欠銀兩為
數無多何以請分作三年之久且羨餘一項又俟
舊欠帶完清楚之日全運現年新引始將所得羨

餘充餉較之楊琳題請發帑收鹽帶銷舊欠之例
不符應令該督孔毓珣將汀州府屬未完積欠勒
限一年照楊琳之例於該府額行鹽包復帶完銀
一錢三分抵補舊欠如有未敷亦將難銷之埠折
於易銷之埠帶完清楚並將新餉一并全完造入
該年奏銷冊內報部等因到臣臣查從前楊琳清
補積欠九十一萬餘兩之內汀屬共舊欠一十三
萬七千四百八兩零核其五年之內汀屬止共帶

完銀六萬八千兩其餘銀兩俱係五省綢緞通融完補是今日即定以三年猶恐逾限如必勒限一年新舊俱令全完此萬萬不能之事臣接准部咨伏念

國課為重不敢復行瀆請再四籌畫惟有暫為通變之法臣請將汀屬二三年分未拆之引概行撥出俟臣酌量各省完餉易銷之埠陸續搭銷除歸抵餉項鹽價水脚工火之外所有羨餘照數歸公其

汀屬本埠令其專銷該年額引如遇天氣晴明場
鹽廣產運銷足額亦可稍有羨餘但以閩省未完
之引目撥出各省代銷實非成例合行

奏明再照今時已八月年內為日無幾臣除一面撥
銷外伏乞

聖恩再寬臣一年之限

勅部查照俾臣竭蹶辦理以期無誤則感戴

天恩於無既矣臣謹

奏

此事候朕諭交戶部密議具奏將所議覆者發來遵照
辦理可也該部議事之公朕可力保外省所辦者如果
情理通順斷不過於苛求若不通情順理即具摺密奏
朕未洞悉原委豈便遽立主見曲從所請耶其中倘有
萬不得已之情不妨據實直陳切勿朦混巧飾該部亦
必不為之遷就也

雍正六年九月十一日兩廣總督臣孔毓珣謹

奏為奏明事竊廣東左翼鎮總兵一缺駐劄順德縣城管轄水陸營汛甚為緊要現任總兵官謝希賢臣觀其人甚明白亦粗知文義但近聞操守平常聲名不好臣面加嚴切誡飭令其改過以無負

皇上擢用弘恩如伊果能悔過自新可以仰邀

聖恩寬宥倘不悛改臣即據實糾叅合行

奏明臣謹

奏

謝希賢向聞操守不好因其署印時奏對甚屬明白朕以為前聞不確故又用今職於陞辭之日為此曾經諄諄教訓若仍不悛改誠乃下愚不移之人也查有貪劣實蹟一面摘印一面題叅如尚無贓款確據或能從此悔過自新則猶可姑寬

同日又

奏為奏覆事竊臣前奏五六月間廣東廣西民間多有暑疾一摺奉到

硃批臣謹祇領臣查五六月間民間暑疾偶有傷生者亦不為大害自六月二十三等日連得大雨之後暑氣頓解隨俱全愈廣東早稻通省實係豐收至晚稻廣肇惠高雷廉瓊等府雨水及時田禾現俱豐茂惟南韶二府山田居多得雨稍遲將來晚收只可五六分其潮州一府高田亦有得雨稍遲者較勝南韶查潮州民間原多種番薯以代米糧現俱大收每觔賣錢一文黃岡碣石一帶每十觔

賣錢七文約計一人一日之食費錢不過一二文
通省米價每石八九錢至一兩二三錢不等廣西
省晚稻得雨有遲早不同其收成分數尚未據報
到米價每石八九錢至一兩一二錢不等恐塵

聖懷合併奏

聞臣謹

奏

覽奏民間暑疾不致為害米價亦平深慰朕懷

同日又

奏為欽奉

上諭事雍正六年九月初二日接怡親王大學士張廷玉等寄字內開奉

上諭廣東濱海之民以魚鹽為業近聞地方官辦理鹽務巡查緝捕過於嚴密未免窮民難於得鹽有妨資生之策於地方無益爾等可寄信與孔毓珣令其悉心商酌當看地方情形如何若從前所報贏餘之數

後此或有不敷不妨據實陳奏懇恩酌減并飭司鹺之員體恤窮民不得苛刻以妨其衣食之計欽此寄信前來等因到臣敬閱之下仰見我

皇上愛養元元無遠弗届之至意臣敢不欽遵奉行惟

是廣東沿海產鹽之地民情頑劣鬻私販私食私

習以為常

臣

雖嚴飭文武官弁上緊緝捕私鹽尚

難杜絕官引猶多壅滯課餉未能完足若少加姑息則私鹽愈行充斥不特無贏餘之項即正課亦

難徵比臣查粵中之販私者多屬游手無賴鬻私

者乃場竈之積奸食私者由豪強之窩縱非盡屬

無以資生之窮民也臣欽奉

聖諭凡有果係貧難老幼肩挑背負者自當仰體

聖慈寬恤其習慣鬻私販私奸徒應仍查察緝捕庶免

誤公至於沿海地方今歲米價頗平無妨於民生

衣食之計合行據實奏

聞臣謹

奏

原係與卿商酌計議卿身任其事目擊地方情形所見自必不謬知道了

雍正六年十月初十日兩廣總督臣孔疏珣謹

奏為奏明遵

旨防範事雍正六年十月初六日接怡親王大學士張廷玉等寄字內開欽奉防範日本國

上諭一道到臣臣謹祇領伏查本年九月二十三日接

浙江督臣李衛密札內開東洋日本國有匪徒潛往打造戰艦招集閩廣浙江之人除

奏

聞外希嚴為防範等語臣思我

皇上聖仁威武四海嚮風蕞爾異夷諒無他念但浙江

督臣李衛札稱既有所聞則粵東與日本亦屬一

此事

虛實未

的只可

密飭防

備不宜

明顯致

令風聲

遠

更

遠

播外

夷生疑

畏之心

加嚴密臣已嚴飭沿海各鎮營勤練舟師設備火

器於汛口出入人船嚴行稽查礮臺時加瞭望今
奉

諭旨臣俟會審事畢即赴厓門虎門塞門附近緊要海
口親歷查察舟師并汛守礮臺其不能周歷之處
分委道府大員巡查如有應行奏

聞之事好臣自當具摺密陳至於水師以礮火為重其砂
礮等項必應存留臣另摺請

旨外所有臣奉到

諭旨防範緣由合行奏

聞臣謹

奏

仍候另降諭旨

同日又

奏為欽奉

上諭事竊臣接怡親王大學士張廷玉等遵

旨寄信到臣內開各省建立祠廟供奉

龍神

上諭一道臣欽遵奉行查廣東

龍神祠在巡撫署東向有僧人一名看守香火住於
接連之

闕帝廟內祠內柵門向係封鎖朔望官員行香始開
並無民間男女人等進廟褻慢臣署撫篆欽奉

上諭復嚴飭僧人敬謹虔奉毋得擅令一人私入廟內
觀者以致褻瀆所有臣奉到

諭旨緣由合行

奏覆臣謹

奏

燒香瞻拜亦屬無妨但不應妄造荒誕之言以愚惑民俗此當嚴禁耳

同日又

奏為請

旨調補緊要之道員以收地方實效事竊廣東雷瓊道

一缺防範海疆非有才具之員不克勝任又廣東引鹽行銷五省向無富商大賈一應收鹽徵餉全賴運使熟悉鹽法方得調劑轉運得宜此缺亦關緊要今雷瓊道王璫丁憂員缺臣查新任廣東鹽運使黃文煒雖才具優長而於鹽法未能熟練若以之調補雷瓊道則於海疆有益至鹽運使一缺臣查現任廣東韶州府知府吳騫老成練達臣於該府前任惠州知府時曾委署理鹽運使事辦理

甚屬得宜今若以之陞補廣東鹽運使則於課餉更有裨益臣因地方與錢糧起見不揣冒昧奏請可否調補出自

聖恩臣謹

奏

留王璠在任守制已有旨諭部矣其間若有人缺不相宜處將此數員應如何互調方收裨益或仍摺奏或竟具題候朕再降諭旨

同日又

奏為奏明事竊臣准吏部咨為欽奉

上諭事雍正六年八月十三日將署直隸總督何世璜
保舉之原選湖廣上荆南道李可淳帶領引

見奉

旨李可淳著賜以道銜道俸命往廣東現今廣東肇高
廉羅道王士俊署理布政使印務其員缺或即將李
可淳署理或另調道員署理肇高廉羅道事所遺員

缺即將李可淳署理之處著孔毓珣傳奏酌量委署
欽此咨行到臣查李可淳係臣親兄孔毓琨女
婿乃臣之姪婿雖例不迴避但以至戚而為屬官
臣不敢隱瞞理合據實

奏明臣謹

奏

李可淳人材甚屬可取所奏知道了當加意勗勉令其
實心任事毋專務潔已而涉於因循瞻顧之習

雍正六年十月二十日兩廣總督臣孔毓珣謹

奏為恭謝

天恩事雍正六年十月初十日臣齊捐人回粵欽奉

皇上賜臣克食一匣哈密瓜一個寧細四疋臣出郭跪
迎進署望

闕叩頭謝

恩領受訖竊臣一介庸愚屢受

皇上恩賜已極人臣未有之殊榮今又蒙

賞賜上方克食並

內府寧細仰荷

寵頒感激無地臣惟有殫竭誠悃并臣子子孫孫仰圖

報効

天恩於萬一耳理合具摺奏

謝臣謹

奏

覽卿奏謝知道了

所奏八達寨西隆州二摺留中廣西距汝駐劄處所相
離甚遠實屬鞭長莫及汝自總督兩廣以來身所到處
朕俱見信至於調遣將領任用屬吏鼓舞勸懲并訪察
地方情弊此等處甚不及朕觀廣西吏治戎政均屬廢
弛故特命鄂爾泰督理已有旨矣今既無兼顧之累可
專力一省若廣東仍有不妥協處不但負朕深恩亦何
顏對直省同列諸臣耶當竭力勉為之

同日又

奏為州牧不宜邊地請

旨調補以收實用事竊查廣西西隆州地方原係改土為流山深瘴重民情蠻野近又改為直隸知州管轄俱係苗蠻是州牧一官必得老成持重者方為人地相宜現任知州劉德健性情褊急除勦捕八達賊衆行間文武不和尚屬小節不必咎責外惟查泥崗寨土蠻原為八達黨附土目蘇亞養已經拏獲該州調取泥崗土勇二百餘名即當設法羈

縻乃於五月十四日冒昧點發禦賊竟致歸入賊
巢幫拒官兵嗣經右江鎮臣段宗岳等差人招出
泥崗把事波弗波歡等四名投撫據供我們舊土
目先被土黃寨陷害因請蘇亞養為頭目保護地
方三年以來在州上糧從無抗違今劉州官將蘇
亞養交土黃頭人勒斃捏報病故又放在土黃叫
我們看因此傷心又那日搬營打仗土兵帶來糧
食喫完人餓得狠又叫打仗是以投入八達今求

免罪情願招波社各土人共捕顏光色等語經泗
城府同知陳師儉會訊准其投撫臣查該州劉德
健既不能相機料理又偏聽土黃頭人之言人多
怨望恐將來未能相安但加叅處則劉德健以文
員而軍前數月亦頗著勤勞相應密摺奏請

皇上特旨將該知州劉德健另調別地補用其員缺臣
查有柳州府雒容縣知縣馬樸又有桂州府靈川
縣知縣牟泰齡此二員均有才具熟練蠻情

皇上欽定一員以之補授西隆州知州於地方得資經理可否伏候

諭旨遵行

臣謹

奏

聞劉德健甚屬不堪其布置失宜情節卿秉公察明酌量或應調用或行革黜一面料理一面奏聞

同日又

奏為奏

聞晚稻豐收米價平減事竊粵東自九月十月以來晚稻結實之候通省雨暘時若現在收穫登場潮州府收成九分八分七分不等南韶二府屬收成七分廣肇惠高雷廉瓊等府并羅定州屬俱係十分豐收通省米價高雷廉瓊并惠潮沿海一帶每石七錢至八九錢不等廣肇南韶羅定等屬每石九錢至一兩一錢不等地方兵民感沐

皇仁咸歌樂利理合奏

聞臣謹

奏

覽奏深慰朕懷切勿增添分數涉於粉飾但以忠誠自律實心為國為民

上天之垂賜嘉應朕可保其必也勉之勉之

今將楊文乾日前所奏并朕之批諭發來爾看即知朕所以待楊文乾與楊文乾所以見信於朕之原委矣或冥冥中伊有負心處耶否則不應身罹此報然此亦不

過疑辭朕惟念其生前之長耳此數摺之奏詞及所批之旨俱當密之又密若稍漏一二語將來必見棄於朕也

雍正六年十一月初七日兩廣總督臣孔毓珣謹奏為敬聆

天語恭摺奏覆事竊臣欽奉

皇上硃批諭旨一道并發

硃批楊文乾奏摺三件到臣臣跪讀之下仰見我

皇上優恤大臣推心置腹既褒寵於生前復

加恩於身後不獨楊文乾銜感九原即臣同為臣子者

覩此

洪恩不覺感而泣下我

皇上天地為懷始終成全臣實如一體身受自當仰體

聖慈成全其一生臣節所有欽奉

硃批并原發奏摺合行恭繳臣謹

奏

果能領悉朕意信而不疑復何憂何慮一切處可放膽
為之不必畏首畏尾辜負朕倚任之心設或仍存為己
私見消融未盡則朕亦減一分倚任之心矣孰得孰失
思之勉之

同日又

奏為奏覆事竊臣欽遵

硃批查得廣州府知府張鎔才具稍短辦事拘謹實非
首郡繁劇之才但其操守清廉人品端正臣因首

郡得人為難廣東一時乏此人地相當之員是以
未敢遽請調補今蒙

皇上詢及理合據實奏

聞臣謹

奏

通省道員朕已有旨命卿酌量人地相宜更調似此者
竟行斟酌委用可也卿等果肯秉公察吏各員優劣朕
之所知自不及卿等就近甄別方為真知灼見也勉為

之若一涉私不但不能見信於朕且恐貽誤不淺封疆重任惟在察吏一節稍有不公誰肯心服衆心不服則呼應不靈諸務難以奏效地方受害不可勝言矣勉之慎之

同日又

奏為據實陳明仰祈

聖鑒事雍正六年十月十七日准吏部咨開內閣交出

上諭一道到臣臣聞

命之下不勝惶悚除將阿克敦等會同署撫臣傅泰
欽差臣留保喀爾紀善嚴審定擬會疏具

題并開列臣職名附叅聽候部議外惟是前撫臣楊

文乾故後臣於七月十二日到省阿克敦方願瑛

等私相聚會臣失於覺察約束罪實難辭荷蒙

聖恩訓飭臣感激無地理合據實陳明仰祈

聖鑒勅部嚴加議處臣謹

奏

似此已誤已失雖悔何益從此知過痛戒將來猶未為晚倘執迷不悛因仍自若恐噬臍莫及也

雍正六年十一月二十二日兩廣總督臣孔毓珣
謹

奏為奏明事竊臣前

題叅革職留任廣東羅定州知州楊廷翼一案臣據
羅定州被詐武舉彭士望控告批司提審嗣據按
察使公元審供具詳贓證鑿鑿臣始據詳

題叅迨准部文奉

旨交撫臣審擬今

欽差臣留保喀爾紀善會訊聞兩次訊供凡案內說事
過錢犯證并楊廷翼家人陳三俱各供認確鑿復
又連日會審嚴刑各令改供不許與原供相同而
反罪及無辜臣非以楊廷翼為臣所叅必欲證實
其罪但臣荷蒙

聖恩高厚不敢隱諱所有本案實情及臣

題祭緣由合再

奏明伏祈

聖鑒臣謹

奏

此案聞所祭不公已有旨矣

硃批諭旨卷七之三